

Pablopa Romanodenidsa ima teppe dosse inajaro

Romanos

Pablopa Romahuaji madimanajari Jesodsa toquejenajaridenidsa ima teppe dsodo inajaro. Pohnuapa nahihuaji tocca-jaraccadsa pohuadenidsa dsodo inapojaro. Pohnuadeni qquide, pohuadeni maride tohuini naraha dsotodena pohuadenihuaji toccajari. Dsotodena pocca benehicca imapi Roca dsodo inajaro (Tahimarideni capítulos 27–28).

Romahuajicca madija mota huapi taha jodio quejena-jarajarideni. Poccadeni odsa panani deni tojanicca, bica taniccapi Roma. Najaro odsa pananicca madijapa jodiodenicca dsama cacahuade toquejenaridsajari.

Romacca madija motapa Jeso tahimari mittamanadsa pajissa quinjari. Nadsapa Dio jipa tahiccassa inanamananjine, poccadeni ima Diodsa bica taniijine Pablo pohuadenidsa dsodo inajaro.

Romanodenidsa Pablo attipa: –Moisesicca marinajadsa iboraqquri tiquinadsapi ticassiejera-jeranitohui. Najarodsa timadimanadsapi ticcadeni ima Diodsa pajiranissa taniijine ssamo tani. Jesocristodsa pajissa tiquinadsana Dio tiadeni tonassiajabaqquihitohui –najari Pablo pocca ima teppe-dsa.

Pablo nija najari

1 ¹¿Nija ohuemecotedeni? Ohuapi Pablo, Jesocristocca medse, tiadenidsa occa ima dsodo onajaro. Jesocristocca dodosse ojanijinepi Dio otohui huahua najaride. Najaroa aji pocca ima bicani madija tocassiejerahijinecca mari mari ohocanabaqquiridsa nahijine omadijaro.

²Maittaccadsama najaro imapi Diojine Pohua Atti cacomeraqquri najarideni huati toquinapojari. Pohua Atti dsodo nanidsapi anini. ³Najaro ima bicanipi aja

Dio Pohua Bedi Jesocristo tahimari. Pina madija bedissa naha tossonajaripa tamine Dabi potemahidsana tossonajari. ⁴Dio Corimejinena Jesocristocca ima ahuato inanajaro. Jeso dsoqquedsapa Dio pocca dacorehema inahatonijari. Najarojinena ima ahuato tajaro: Ia Medse Jesocristopa Dio Bedi.

⁵Najarina ohuadsa huati huana tadsa ohua cadossejari, dsama huapimacca madija pohua oni mittaridsamanahijine. Ohuattipi: –Jesocristodsa pajissa tiquinanissa taji. Pocca marinajadsa iboraqquri tiquinaji –ohonaridsa

nanijine ohua cadossejaride.
⁶⁻⁷*Romahuaji timadimanajaro tiadenidsa naqui Jesocristo tahi-mari bacco tajaro. Dio titohuideni huati cahanari canadsapa Jesocristocca madija tiquejenanijine titohuideni huahua najaride. Aja icca Abi Dio, ia Medsede Jesocristo tedseje tiadenidsa ima bicani inamanadsanapona, onajaro. Icca Abi Diocca jonehe naqui tiadenidsa tojadsanapona. Ia Medsede Jesocristocca jonehe naqui tiadenidsa tojadsanapona, onajaro.

**Pabloa: –Romahuaji
 occana –najari**

⁸Jehe, tahide titohuideni Jesocristo onima Diodsa huati huati ohonanadsapi: –Jehe Abi Dio, *epejeni. Tijine bicaqu岸i nahi –ohonanjaro. Ia Medsede Jesocristodsa jehe tiquinadsa pohua attidsa iboraqu岸i tiquinadsapi titahimarideni huati huati quiquinanahi ohomittaridsa najaro. Dsama huapimacca madija attideni: –Romanodenicca jehenijipi dacorani –nanaridsamana nahi omittadsa titohuideni Diodsa huati huati ohonanjaro.
⁹Obodi ohuassirema Diodsa odsepe ihiji najaro. Pohua Bedi tahi-mari icassiejeranijinecca maride dissera onajaro. Diopa occa ima qqui tahi, nahato tahi. Najaroa titohuideni Diodsa huati huati ohodsanapo najaro. ¹⁰Tiadeni quide occanijine Diodsa huati huati ohonanaraha jehe najaracahi. Dio ohuattidsa jehe nadsapa nidsa tiadenihuaji bacco onanitohui.
¹¹Tiadeni qqui onabaqu岸inijine tohuini onani. Tiadenidsa Dio Atti

ohuacomersapi Pohua Corimejine Pohuadsa jehe tiquinajaro todacorani nanijine, onajaro. ¹²Aji tiadeni Jesocristodsa jehe tiquineje, ohuassa Jesocristodsa jehe oneje nadsapi tiadeni tedseje icatidserara cananijine, onajaro.

¹³Ohuemecotedeni, nahatoqu岸i tiquinanijine onadsa huajjiradsa ohuapi nani occanijine occa benehi ohonajora naraha occa benehi huajjiradsa tossamo tossamo dsanaponi. Nidsa tiadenihuaji occadsa tiadeni mari ocanabaqu岸idsapi ticcadeni madija ohuaha naco Jesocristodsa toquejenahijine, onajaro. Ajana *jodio quejena-jarajarideni dsama onihihuajicca, dsama onihihuajicca mari ocanabaqu岸iridsapodsapa Jesocristodsa toquejenana canade. Tiadenihuaji ima najarossa nanijine jipa onajaro. ¹⁴Jesocristo otohui huahua najaripa: –Madija dsama huapimacca otahimari mittamanahijine maride ticcaridsaji –najaride. Nadsapi pina odsapananidsa madimanajaridenidsa, dsama dopedsa madimanajaridenidsa naco pohua tahimari mittamanahijine maride occuridsajaro. Aja papeo nahatoqu岸i najaridenidsa, papeo ssamoqu岸i najaridenidsa naqui Jesocristo tahimari mittaridsamanahijine maride onebojerajaro. ¹⁵Najarojinea Romahuaji timadimanajaro naqui Jesocristo tahimari icassiejeranijinecca tiadeni mari ocanabaqu岸inijine jipa onajaro.

**Jesocristo tahimarina
 dacorabote ojarini**

¹⁶Ohuapi *Jesocristo tahimari icassiejeranijinecca ohuacomeranijinepi ocappina-jerajaro. Ohuapi

nahato onani: Jesocristo tahi-maripa Diocca dacorehe madija tocassiejerahijine, onajaro. Tahidepi *jodiodenidsa, dsotodepa *jodio quejena-jarajaridenidsa naco Jesocristo tahimari dacorajaro. Huapima najarodsa jehe quinadsapa tocassiejerahijine. ¹⁷Aji Jesocristo tahimaridsana Dio ia tonanabica-baqquihijinecca ima ahuato tajaro. Jesocristodsa pajissa inadsapi pohua tahimarijine imasiri inana-jaro manaconipi jicani. Icca jeheniji najaro ojarjaropi Jesocristo tahimari iadsa tojajaro. Dio Atti dsodo nanidsa ajima najaro: –Madija bica tajari Diodsa pajissa najaripa najaro jehenijima madi-dsanapohuitohui –nahi nade Dio.

**Madija huapima ima
inanamanani ahuato tajaro**

¹⁸Madija imasiri totonanadeni cajiridsahi. Nidsa Diocca najidsohue oppinabote memehuaji ccaronadsa pohuadenidsa ssonarinitohui. Najaridenipa poccadeni tabaccorehejine pajissacca ima tocahatterahijine ssamoqquri nahi. ¹⁹Dio tahimariپی ahuatoridsajaro. Pohuadenidsa naqui ahuato tani. Diojine pohuadeni bodi nahatoqquri najari. ²⁰Diopa innocodsa qqui inajarahi. Pocca ima naqui innocodsa qqui inejeraraha dsama Dio inahatoponidsama pocca dacorehe jiquejeranicca, pocca deni tojehe huapimadsa ahuatojonajaro. Pocca nahatohue qqui inaridsajaropi najaro imadsa ibodi huahuatoma nadsapi Diocca ima iadsa ahuato tajaro. Naraha madija imasiri tohui quinajaridenipa: –Dio tahimari iadsa ahuato

tejerani –quiquinanaraha pohuama maidsamanajari. ²¹Pohuadenipa Dio Pohuadsa bodideni nahatoqquri naraha Diodsa: –Bica tinani, deni tijani –quiquinana-jarajari. –Epejeni. Tijine iadsa ima bica tani –quiquinana-jaradsa naco pohuadeni bodipa ima ponimaccdsara toquejenaridsajari. Bodideni tossamoridsadsapa dsidsinidsa toquejenajari. ²²Attidenipa: –Nahatojide ojirajaro –quiquinanaraha ssamoqquri nahi.

²³Madijapa huatia tahi. Naraha Diopa huatiehera tajari. Pocca deni tojehe huapimadsa ahuato taraha Pohuadsa jehe quina-jaradsapa madija huatiahaqquri najarideni corime inahatomanadsa najaridsana: –Ia cacahuade –quiquinanajari. Aja bani eppe cajihi corime naco inahatomana, namidsa jajahiridsa najari aja biji caji isso caji najarideni corime inahatomana, pohuadeni baccodenidsa jajahiridsa najari corime naco inahatomana nadsa poccadeni nahatonajadsa: –Ia cacahuade –quiquinanajari.

²⁴Najarojinea Dio inebobaqqujari. Pohuadeni bodidsa tabaccorehe tohuini quinadsapa huananehecca imadsa toquejenajari. Pohuadeni tesse tedseje huananehe oppina tanicca inanamanajaro. ²⁵Diocca imapi pajissaccaraha Diocca imadsa huattajojo tajari. Maidsehtohuir disseraqquri najari. Dio inahatoridsajari corime inahatomanadsa najaridsa huahuatidsemana nadsapa: –Ia cacahuade –quiquinanajaripaja. Pohuadeni Nahatode Diodsara huatidsemanahijine bica taraha nama quinajarajari. Pohuadsa: –¡Bica tinani, deni

tijani! – ihidsanapo nanijine bica tani. Pajissa nema nana.

²⁶Naraha madija pohuadeni cacahuade ohuahadsa disseraqquri nadsapa Dio inebobaqquidsapa poccadeni huananehe oppina taniccasda toquejenajari. Aji amoneje ponidenicca maqqi najade jiperaqquri najaropi ponidenira ima oppina tanicca inanamanajaro. ²⁷Maqqideje naco poccadeni amoneje ajade jiperaqquri najaripa pohuadeni tesse tedeseje ima oppina tanicca inanamanajaro. Najaro imadsa disseraqquri nadsapa poccadeni ima oppina tajaro. Nama quina dsapa pohuadeni imedsa comani ihinahanamana najaropaji, poccadeni huananehe manaconi.

²⁸Diodsa bodideni huatohuijine jiperaqquri nadsa Dio Attipa: –Apajana. Pohuadeni bodi pohuadeni tohuini quinadsapa nama naha madimana-dsanapohuijine –najari. Najaria madija huapima ima bica tejeranicca inanaridsamanajaropaji. ²⁹Najaria madija pohuadeni bodidenidsa imasiri sseqquri naha madimana taja, imasiri inamanadsa huatidsemana taja najari. Poccadeni dacorehema: –Ohuana denima ocajina –quina taja, –Madija ohuahacca ima onatabaccorana –quina taja najari. Pohuadenipa madija ohuahacca deni tojehe acconi bodideni huadiqquri najari. Pohuadenipa madija inana dsoquemana tahi. Amadsati naco cahadire tahi. –Icamaidsabaquina –quina tahi. Tabaccorehe denima tabaccora tanicca tohuini quina tahi. Pohuama madija ohuahacca ima ahuatoranidsa huati iqquimana tani. ³⁰Madija ohuahadenicca

ima totabaccoranijine huatijidede raja, Diodsa jiperaqquri naja najari. Madija ohuahadsa attideni bica tajaradsa atti atti quina taja, madija ohuahadenipa: –Iana bicaqquri inajaro –quina taja, madija ohuahadenipa: –Iana deni iquejenani –quinajari huati huatijidede raja najari. Pohuadeni bodidsa ima tabaccora tanicca inahatomana teje, imehideni attidsa naco iboqquri naja najari. ³¹Pohuadenipa ima bicani mittamanahijine jiperaqquri najari. Pohuadeni attipa: –Tiadenidsa nabica onanitohui –quiquinanaraha mamaidsamana najari. Poccadeni madijadsa naco huatideni huanaqquri najarahi. Madija ohuahadsa naco huatideni huanaqquri najarahi. Huadiecca naco huatideni ssonaneraqquri najari. Poccadeni madijacca ima tossamodsapa naqui: –Tia acco ocamana –quina-jarahi. ³²Madija nama quinajaridenipa Dio Atti mittamanaporaha. Aja Dio Attia: –Imasiri inanamanajarodenipa paja jicarihitohui –naha nahatoqquri najari. Naraha pohuadeni cacahuamana-jaradsapa imasiri inanamana-dsanapojaro. Madija ohuahadeni imasiri inanamanani qqoi toquinadsa naco: –Jehe, bica tani –quiquinanajari.

**Diopa madijacca ima
cattemade tojadsapa
pajissara huati tahitohui**

2¹Imasiripi ajima nani onadsa tiadenidsa dsodo onajaro, nani nahatoqquri tiquinanijine. Madija ohuahadsa: –Ticcadeni ima tabaccora tani –tiquinadsapi tijinideni ticcadeni imasiri ahuato tanitohui.

¿Nejecotohui madija ohuahacca imara huati huati titiquina najaro? Najaro imassa tinanamanajaro-jine Diocca najidsohue tiadenidsa ssonarinitohui. ²Madija ima inamanadsapi Dio Attipa: –Tijinedeni ima tabaccora tani –najari. Nadsapa pohuadeni inajidsobaqquihitohui. Iapi nahatoqquri inani: Diopa poccadeni ima nahato tajaria pajissara huati tajari. ³Naraha ticcadeni imapi ¿nejecoma nejecoma najaro? Tiadenipi: –Madija ohuahacca ima bica tejerani, Dio inajidsohuitohui –tiquinaraha tiadeni naqui pina pocca imassa tinanamanadsapi ¿Diocca najidsohue dsoriticanirepadseje? Dsori ticanirejeranitohui. ⁴Diopa tiadenidsa huati huana tajari. Biquehe huapi tanicca tiadenidsa inanaridsajaro. Dio Pohuadsa pajissa tiquinanjine tinajomanadsa naqui titohuideni denima madicajari. Naraha najaro ima huapimapi tiadenidsa pina ponimassa najaro. Aji Djijine ima bicani tiadenidsa tojajaropi tibodideni cacajiquimeranjine. ⁵Naraha tiadenipi Diodsa iboqquri tiquinajaro. Tibodideni cacajiquimeranjine jiperaqquri tiquinadsapi ticcadeni imasiri manaconi najidsohue onihi onihi nehe tinehemamanajaro. Nidsa dsotode Diocca huadie tojanijinecca huada bacco tadsapi tiadenidsa najidsohue ssonarinitohui. Dio Pohua tedsejema tidomo huadsa Dio ticcadeni ima manaconi inapajirannisa tani ahuato inananitohui.

⁶Nidsa Diopa huapimadsa poccadeni ima manaconi pohuadenidsa da inanitohui. ⁷Madija ima bicani inamanajarodenidsapa Dio pocca

camittehe jiquejeranicca da inaridsanitohui. Pohuadenipa Diocca deni tojehetohui madimanajari. Pohuadenidsa Dio: –Occa ejedenideni, bicaqquri tiquinani –nahijine tohuini quinajari. Camittehe jiquejeranicca tohuini naco madimanajari. ⁸Naraha madijapa poccadeni ima tohuinira disseraqquri najaridenidsana Diocca huadie ssonarinitohui. Najaridenipa Diocca ima pajissaccadsa iboqquri najari. Tabaccorehena pohuadenidsa bica tajaro. ⁹Tabaccorehe inamanajaro huapimapa najidsohue tonahanamanahitohui, ocasserehe tonahanamanahitohui. Jodiodenidsa, jodio quejena-jarajaridenidsa naqui ssonarinitohui. ¹⁰Naraha ima bicanira inamanajarodeni huapimadsana Dio pocca deni tojehe inananitohui. Pohuadenidsa: –Occa ejedenideni, bicaqquri tiquinani –nahitohui. Pocca jonehe naqui pohuadenidsa tojanitohui. Jodiodenidsa, jodio quejenajarajaridenidsa naco nama nahitohui. ¹¹Dio Pohuadsa jodiodenicca ima, jodio quejena-jarajaridenicca ima tadsajanipi najarossa caniquimerajaro. Jodiodenidsara denima huati huana tahi ojari najarahi.

**Dijine jodio quejena-jarajari
bodideni nahatoqquri
inanabaqqipojari**

¹²Nidsa dsama jicanijinecca huadadsana Diopa madija huapimacca ima icattemanitohui. *Diocca dosseniji Moisesidsa da inajaro cappiramanaha madimanajaridenicca imapi Moisesicca marinajadsa icattema-jeranitohui. Naraha imasiri inamanajarojine paja

dsoquemanarihihuaji najidsohue tonahanamana-dsanapohuitohui. Moisesicca marinaja cajimanajari-denipa najaro marinajadsa imarideni icattemanitohui. ¹³Aja madija Moisesicca marinaja mittamanaraha pina najarossa inanamana-jeradsapi Diodsa tobicamana-jarajari. Diopa pohuadenidsa: –Imasiri ticajimanani –najari. Naraha Moisesicca marinaja mittamanajarideni pina najaro marinajassa inanamana-dsapi Diodsa tobicamanajari. Diopa pohuadenidsa: –Imasiri ticappiramanani –najari.

¹⁴Naraha jodio quejena-jarajari-denipa Moisesicca marinaja cappiramanaraha pina najarossa inanamansapi pohuadenidsa ajijaro ima ahuato tajaro: Djodine bodideni nahatoqquri najari. Pohuadenipa bodideni huatomanahissa tadsapa ima bicani nahatoqquri nahijine. ¹⁵Nadsapi poccadeni madiesa ima ahuato tajaropi pohuadeni bodidsa Diocca dosseniji cajimanajari. Bodideni huatomadsapa ima bica tanicca nahatoqquri, ima tabaccora tanicca nahatoqquri najari. ¹⁶Nidsa Dio madijadenicca ima nattome inabaqquihijinecca huada bacco tadsana Jesocristo idossehitohui. Nadsana madija bodidenidsa ima ecomamanajaro Jeso ahuato inanitohui. Najaro ima tojanijinepi Jesocristo tahimari icassiejernijinecca mari mari ohonanajarodsa huati huati onapode.

**Jodiodenipa Moisesicca
marinaja cajimanaraha**

¹⁷*Jodiodeni mota tettidenipi: –Iapi jodio iquejenani. Diocca dosseniji Moisesidsa da inajaropi

icajini. Icca Diona deni tojajari. Pohna ia tocattejdidsabaqquijari –titiquina najaro. ¹⁸Tettidenipi: –Iapi Dio Pohna jipa tahicca nahatoqquri inajaro. Moisesicca marinajajine ima bicani icattejdidsanijine naqui icahatterani –titiquina najaro. ¹⁹Tettideni naqui: –Iapi Dio Atticca ssajani cajimanahijine inahattabaqquihijine ipajirani. Pina noccodeni siri jahinedeni dsopi icanabaqquijarissa, pina dsidsinidsa jahiridsajarideni piri icanabaqquijarissa inajaro –titiquina najaro. ²⁰Tettideni naqui: –Moisesicca marinaja icajidsapi nahatoqquri inani. Pajissehecca ima iadsa ahuato tani. Madija ssamoqquri najari pina ejedenissa quinajarideni inahattabaqquihijine nahatoqquri inani –titiquina najaro.

²¹Tiadenipi Moisesicca marinaja ticajimanaraha ¿nejecotohui najaro marinajassa nehe tinamanajerajaro? Tiadenipi madija ohuaha mari mari titicanabaqquimana naraha tiadenipi tiadeni mari ticananimanehe nejerani. Tettidenipi madija ohuahadenidsara: –Botimana tiquinejeraji –titiquina naraha tiadeni naqui ¿botiraqquri tiquinaqui? Botiqquri tiquinani. ²²Tettideni onihi naqui: –Amoneje onihi ajamana tiquinejeraji –titiquina naraha tiadeni naqui ¿amoneje onihi ajajera tinaqui? Amoneje onihi ajaja tinani. Siba nahatonidsa naqui jiperaqquri tiquinajaro. Naraha tiadenipi aja siba nahatonidsa dada tahicca titibotimana nahi. ²³Tettideni onihi naqui: –Moisesicca marinaja bicabote icajini –titiquina naraha Moisesicca marinaja

tecahuamananissa tejeradsapi tijinedeni madija ohuaha attidenipa: –Diocca imapi bica tejerani – quiquinanajari. ²⁴Najaro imapi Dio Atti dsodo nanidsa ajima napojaro: –Tijinedeni jodio quejena-jarajaridenipa Diodsa attideni ocassera tadsa atti atti quinajari –nani nade Dio Atti dsodo nanidsa.

²⁵Jodio tiquejenadsapi *huissinaja ticajimanajaro. Moisesicca marinaja tecahuamananissa tadsapi Diopa tiadenidsa ima bicani inananitohui. Naraha Moisesicca marinaja tecahuamananissa tejeradsapi ponima huissinaja ticajimanajaro. Diopa tiadenidsa huatidse-jarahitohui. ²⁶Aja jodio quejena-jarajaridenipa huissinaja cappiramanaraha pina Moisesicca marinajassa inananadsapi pohuadenina pina pajissa jodiodenissa quinajari. Ima bicani cajimanahi. ²⁷Naraha jodiodenipa huissinaja cajimanaraha motapa Moisesicca marinaja ecahuamananissa tejerani. Nidsa dsama jicadsa jodiodenicca huissinaja cappiramanaraha Moisesicca marinajassa inananajarodenina aja Moisesicca marinaja dsori inananajarodenidsa huati toquinahitohui: –Moisesicca marinaja nahatoqquri tiquinaraha najarossa tinanamajarajaro –quinahitohui. Pohuadenijine poccadeni imasiri ahuato tanitohui. ²⁸Madijapa jodiodenicca etero huedsamanadsa jodio toquejenahi ahuatoqquri najari. Imedenidsa huissinaja cajimanadsa naco jodio toquejenahi nahatoqquri inajaro. Naraha madija jodio toजारिपा pohua huapicca, pohua imeccaha ojari-jerani. ²⁹Madija

pajissa jodio tojadsapa pohua bodi Diodsa ibora tajarina paja. Pohua bodi Dio inahiredsapa pina huissinaja cajjarissa najari. Moisesicca marinajadsa bodi tobica-jararaha Dio Corimejinena bodi tobicajari. Najarojine Diopa pohuadsa jipa tajari. Madija attideni pohuadsa: –Bica tinani –quina-jarahitide naraha Diona: –Bica tinani –najari.

3¹ –Nadsama jodio iquejenajaropi ¿ima nejecoma najarona iadsa denima bica tajaro? ¿Iapi ponima jodio madija iquejenaqui? –tiquinanitidija. –Huissinajacca ima icajidsapi ¿Diojine iadsana denima ima bica tanicca icajiqui? –tiquinanitidija. ²Jehe, ima bicanipi ia jodiodenidsana onihi, onihi nehe Diojine icajipojaro. Ima bicani deni tojaniccapi Diojine icca madijadsana Pohua Atti tojapojaro. Najarao aji Pohua Atti cacahuade iquejenajaropaji. ³Naraha icca madija motana Dio Atti ecahuamana-jerajaro. Nama quinaraha ¿Diopa ia jodiodenidsa Pohua Attissa inana-jerapadseje? ⁴Nohue-rahi. Diopa maidsara tajari. Madija huapimapa maidsaqquri naraha Diopa maidsa-jarahi. Ima pajissara ihinana najaro. Dio Atti dsodo nanidsapi ajima najaro:

–Huapimadsa ahuato tanitohui. Tiapi pajissehe ponira huati huati tinajaro.

Madija attideni Tiadsa: “Ticca ima pajiranissa tejerani” quinaraha Tiana deni tjanitohui. Tettina pajiranissa tajaro –nani nade Dio Atti dsodo nanidsa.

⁵Madija attidenipa ajama quinahitide: –Icca imasirijine Diocca ima pajiranissa tani ahuato tajaro. Ijine ima nema nadsapi ¿nejecotohui Dio ia tonajidso-baqquijari? –quinajari. ⁶Naraha iapi nema inejerana. Oppina tani. Diopa tabaccora tajarahi. Diopa bica tahi. Nassa Diocca ima pajiranissa tejeradsapi madija huapimacca ima cattemade pajira-jaranaja. ⁷Madija ohuaha attidenipa: –Maidsehe huati onadsapi najarodsa Diocca pajissehe denima ahuato tani. Ijine Diocca pajissehe ahuato tadsapi madijapa: “Jehe, Diopa bica tahi” quinahitohui. Icca maidsehe nema nadsapi ¿nejecotohui Dio iadsa: “Ticcadeni imasirijine najidsohuedsa tiquejenaji” najari? –quinajari. ⁸Attideni nama quinajaripa nassa poccadeni marinaja onihi inanamanajaro. Pina: –Imasiri inanadsapi ima bicani ahuato tanitohui –quinajarissa najaro. Madija mota attidenipa: –Pablodenina najaro ima mari mari ihicanabaqqui najari –quinajari. Naraha maidsamanajari. Nidsa dsama jicadsa madija nama quinajaridenipa najidsohuedsa toquejena dsapa bica tani, onajaro.

Ia huapimapi imasiri inanajaro

⁹Naraha ¿jodio iana denima bicaqquri inajaroqui? Nohuerani. ¿Madija ohuahapa poccadeni biquehe ajimaniqui? Nohuerahi. Ia huapimapi imasiri icajiridsani. Tiadenipi ima dsodo onopojarodsa timittamanaponi. Aja jodiodeni, jodio quejena-jararideni ia huapima imasiri inananijinepi imasiri iadsa dacorani. ¹⁰Dio Atti dsodo nanidsapi:

–Madija ima bicani tonana-hijine nohuerahi.

Dio qqui inabaqquidsapa ojaria imasiri cappirajari nohuerahi.

¹¹Madija bodi nahato tajari nohuerahi.

Madija Diotohui najari naco nohuerahi.

¹²Huapima Diodsa tohuajimanageri.

Pohuama jajahiridsa najari.

Madija ojaria ima inanabicanijine nohuerahi.

¹³Madija attideni oppina tadsapi ssporideni pina tonocobiri tohuabajarossa najaro.

Pohuadeni ebenodsa naco madija icamaidsabaqquimanajari.

Ipodenidsa madija inatabaccoramanajari pina macca comabote madija cca idsadsa comene ahuajarissa quinajari.

¹⁴Pohuadeni ajaridsa tohuatti bida tajaro qquequena najaro.

Madija ihitamassomana najari.

¹⁵Amorideni huassiqquiri najari, tohuemene toccanijine tohui.

Madija ijinedeni ahumanahijine najoramanaha madimanajari.

¹⁶Ajana, pohuadenipa madija ohuahacca madie tonatabaccoramanajari.

Pohuadenijine madija ocasserani ahahuamana najari.

¹⁷Joneheda madimanahijine ssamoqquri najari.

¹⁸Dio noppine cappinaqquri nadsapa bica taraha pohuadenipa Diodsa cappineraqquri najari. Bodideni huato huissa tajarahi

–naponi nade Dio Atti dsodo nanidsa.

¹⁹Nahatoqquiri inani: Diopa pocca dosseniji huapimapi jodio-denidsana da inajaro. Naraha pocca dosseniji nemanhe ecahuamananissa tanijine pajiramana-jarahi. Ima nema nadsapi: –Bicaqquiri inani –quinahijine ssamo tani. Nidsa Diopa ajijaro dsamacca *madija huapimacca ima cattemade tojadsapa Moisesicca marinajadsa imarideni icattemanitohui. Nadsapi madija ia huapimapi icadidire nanitohui. ²⁰Madija attidenipa: –Iapi *Moisesicca marinaja ecahuanissa tani –quinaraha Dio Attipa: –Jehe, ima ticappiramanani –najarahitohui. Moisesicca marinajajinepi imasiri nahato inajaro. Najaro cacahuade ipajira-jeradsapi ia huapima imasiri icajini ahuato tajaro.

**Icassiejeranijinepi
Jesocristodsa pajissa inajaro**

²¹Naraha jidapapi Dio iadsa ima onihi ahuato inanajaro: Moisesicca marinaja jirehe icca ima Dio Pohuadsa tobicanijine pajirani. Najaro imapi Moisesicca marinaja nemanehedsa nema napojaro. Dio Atti cacomeraqquiri najari ohuahadeni naco huati toquinapojaripaja. ²²Madija Jesocristodsa pajissa quinajarideni huapimadsana Dio ajama najari: –Ohuadsa bicaqquiri tiquinani –najari. Diodsapa jiodideni, jodio quejena-jarajaridenicca imapi najarossa caniquimerajaro. ²³Madija huapimapi imasiri icajiridseje najaro. Diocca deni tojehe-dsa iquejenanijine ipajiranissa tejerajaropaji. ²⁴Aji icca imasiri manaconi najidsohue icajinitohuiraha Jesocristo pohuajinena Dio

ia tappa tabaqquijari. Dio iadsa huati huana tadsa manaconi jirehe iadsa: –Tiadenidsapi ima nohuerani. Ohuadsa bicaqquiri tiquinani –najari. ²⁵Diopa Pohua Bedi Jesocristo dsoqquehijine eccoradsapa madija huapimadsa nohue inajaro: Pohuapa imasiridsa huadi tajari. Ahua porimacossanidsa Jeso emene toccajaropi icca imasiri manaconi da inajaro. Itohui Jeso dsoqquejari tahimaridsa pajissa inadsapi Dio iadsa: –Jidapapi ticcadeni imasiridsa ohuati ajimani –najari. Diopa nama najaria iadsa nohue inajaro: Pohuajine pajiranissa tani. Aja tahide Jesocristo dsoqquejaraccadsama Diopa madijacca imasiri qqui taraha pina qqui torahi najari. ²⁶Pohuapa nama najaria –Amadsati onajidsobaquina –najarajari. Mohuaradsa poccadeni imasiri inahanajonajaro. Jidapapi ima pamehe Dio Pohuajine iadsa ahuato tajaro: Jidapapi Dio Pohuajine pajiranissa tajaro. Jesocristodsa pajissa quinajaridenidsa: –Tiadenidsapi ima nohuerani –nadsa naco Pohuajine pajiranissa tajaro. ²⁷Madija Moisesicca marinaja ecahuamananissa tadsapi attidenipa: –Ojine ima pajiranissa tani –quina tahi Diodsa. Naraha attideni ponima tojajaro. ¿Ima nejecoma najarojine attideni ponima totoja najaro? Madijacca ima Diodsa tobicanijinepi madijajine jerani. Jesocristodsa pajissa nadsana pocca ima Diodsa tobica najaro. ²⁸Najarojine ettipi: Madijacca ima Moisesicca marinaja jirehe Diodsa tobicani pajirani, inajaro. Jesocristo tahimaridsa pajissa inadsapi Dio Atti iadsa: –Jidapapi

ticcadeni imasiri manaconi tiadenidsa nohuerani –nahitohui, inajaro.

²⁹ ¿Diopa jodiideni pohuadeni mottacca Dioco? ¿Dsama onihicca madijadenicca Dio jaraco? Naraha imapi ahuate tani. Diopa dsama huapimacca Dio. ³⁰ Diopa ojarahi. Madija jodiidenicca huissinaja cajimanajari Jesocristodsa: –Pajissa, ohua Tonassijade –quinadsapa Dio pohuadenidsa: –Jidapapi ticcadeni ima tiadenidsa nohuerani –nahitohui. Jodio quejena-jarajari deni Jesocristodsa pajissa quina-dsa naco Diopa pohuadenidsa ima najarossa inananitohui. ³¹ Nadsama Jesocristodsa pajissa inadsapi ¿Moisesicca marinajapi ponima tojanijinequi? Ponima toja-gerani. Jesocristodsa pajissa inadsapi Moisesicca marinaja inapajiranissa tajaro.

**Abarahao tahimaridsa
icahatterajarocca ima**

4 ¹ Icca idi *Abarahaopa ¿nejeco imadsara Diodsa tobicajarit-ta? ² Ima bicanidsa pohua dsepe ijjarijine Diodsa tobica-jarahi. Aja pohua dsepe ijjarijine Diodsa tobicadsapa nassa: –Ohua ojine Diodsa obicajaro –nahitohuiraha imapi nema nejgerani. ³ Naraha Dio Atti dsodo nanidsapi ajima najaro: –Abarahaopa Diodsa pajissa nadsana Diopa: “Abarahaopa ohuadsa bica tahi” –najari.

⁴ Ajjaro namicca imapi ajima najaro: Madija tarabaidsa najaripa pohua tarabaidsa najari manaconi cajijari. Naraha tarabaidsa dossedepa pohuadsa: –Aja, tiadsa manaconi jirehe da onana –najarahi. Tarabaidsa dossedepa:

–Aja, tiadsa ticca tarabaidsa manaconi da onajaro –najari.

⁵ Naraha Diopa madija imasiri cajjaridsa: –Tiapi ohuadsa bica tinani –nahi caji tahi. Nama najaripa madija pohua dsepe ijjarijine gerani, ima bicani inanajarojine gerani. Najari madijapa Diodsa: –Pajissa Dio madihi –nadsana Dio Attia: –Ajajari madijapa ohuadsa bica tahi –najari. Diodsa pajissa najarijine pocca ima Diodsa pajiranissa tajaro. ⁶ Najaro imapi maittaccadsama tamine Dabi naco huati tapojari: –Madija pohua dsepe ijjaripa Diodsa pohua tonanabica-jararaha Diodsa pajissa nadsana Dio pohuadsa: “Bica tinani” najari. Nadsapa najari madijapa huatidseri dsanapojari –nahi nade Dabi. ⁷ Dabi pohua huati tapojaricca imapi Dio Atti dsodo nanidsa ajima najaro:

–Madijacca imasiri Dio sse inaridsadsapi huatidsemaneri najari.

Poccadeni tabaccoreheda: “Epeje, ohuati ajimani” nadsa naco huatidsemaneri najari.

⁸ Imasiri inanamanapojarocca ima Dio inajicadsapi huatidsemaneri najari –nahi nade Dio Atti Dabijine dsodo nanidsa.

⁹ Aji ¿najaro huatidsehepi jodiidenicca huissinaja cajimanajaridenidsara ojarinijinequi? ¿Madija jodiidenicca huissinaja cappiramanajaridenidsa naqui tojaridsanijinequi? Naraha etipi: Abarahao Diodsa pajissa nadsapa: –Abarahaopa ohuadsa bica tahi –najari, inajaro.

¹⁰ Naraha ¿nejecoma nadsa Diopa: –Abarahaopa bica tahi –najaritta? ¿Abarahao huissinaja cajidsattaco?

¿Huissinaja caji-jaradsattaco?
 Naraha huissinaja caji-jaraccadsama
 Diopa: –Abarahaopa ohuadsa
 bica tahi –napojari. ¹¹Dsotodena
 Abarahaodsa Dio huati tajari:
 –Huissinaja ticajiji –najari. Najaro
 huissinaja cajidsapa Abarahao Dio-
 dsa jehe napohuicca ima ahuato
 tajaro. Nadsapa madija ohuahadeni
 naco huissinaja cappiramanaraha
 Diodsa jehe naridsamanadsapa
 Abarahaopa pina poccadeni abissa
 najaripaja. Najaridenidsa naco
 Dio Atti: –Ohuadsa bicaquiri
 tiquinani –najari. ¹²Madija huissi-
 naja cajimanajarideni naco Diodsa
 pajissa quinadsa pina Abarahao
 huissinaja cappiraccadsa Dio-
 dsa pajissa najarissa quinadsapa
 Abarahaopa pina poccadeni abissa
 najari.

**Diopa Pahuadsa pajissa
 quinajaridenidsa pina
 Abarahaodsa huati
 tapojarissa inananitohui**

¹³Maittaccadsama Diopa
 Abarahaodsa huati tapojari:
 –Tiadsa, tipotemanidsa *ima bicani
 onananitohui. Tiadenidsa dsama
 nemanehe da onanitohui –napojari.
 Naraha pocca huatinajapi Abarahao
 Diocca dosseniji ecahuanissa
 tajarojine jerani. Abarahaopa
 Diodsa pajissa najarijinena pohua-
 dsa tojajaro. Pocca jehenijijinena
 Dio Attia: –Abarahaopa bica tahi
 –nanaja najari. ¹⁴Aja Dio huati
 tapojaricca ima bicanipi Pahuadsa
 pajissa quinajaridenidsa tojajaro.
 Aja madija Diocca dossenijidsa
 iboraquiri najaridenidsana pocca
 huatinaja tojadsapi nassa Diodsa
 pajissa quinajaridenicca jehenijipi

ponima tojanitohuiraha. Diocca
 huatinaja naqui ponima tojanitohui-
 raha. ¹⁵Madijapa Diocca dosseniji
 ecahuananissa taniijine pajira-
 manaraha. Dsori inanananadsapi
 najidsohuedsa bacco toquina-
 hitohui. Naraha najaro dosseniji
 nohueradsapi madija dsori inana-
 mananijine pohuadenidsa nohue-
 rani.

¹⁶Naraha Dio huati tapojaricca
 ima bicani Abarahao potemahidsa
 tojajaropi Diodsa pajissa quina-
 dsana pohuadenidsa tojajaro.
 Moisesicca marinaja cajimana-
 jaridenipa pina Abarahao Diodsa
 pajissa najarissa quinadsapa Diocca
 huatinaja pohuadenidsa tojajaro.
 Ia naqui pina Abarahao Diodsa
 pajissa najarissa inadsapi Diocca
 huatinaja iadsa tojajaro. Nema
 nadsapi Abarahaopa ia pajissa
 inajaro huapimacca abi tojajari,
 inajaro. ¹⁷Dio Atti dsodo nanidsapi
 ima ajima najaro: –Ojine dsama
 huapimacca abi tijajaro –najari
 Dio Abarahaodsa. Diopa madija
 huatiahi Pahuajine camitemanihi
 pajirajari. Ajijaro dsamapi nohuera-
 poraha Dio Pahuana inahatojaro.
 Aja dsamacca cajiridsajari naco
 nohueraraha Dio Pahuana inahato-
 ridsajari. Najaridsana Abarahao
 pajissa najari.

¹⁸Abarahao jadahi tocaya, bedi-
 meni jadani tocaya nadsana Dio
 pohuadsa huati tajari: –Tipotemani
 ticajinitohui –najari. Ejedeni
 cajimanahijine tossamomana-
 raha Abarahaopa Diodsa pajissa
 nadsa: –Ohua opotemanipa huapi
 taha ocajinitohui –najari. Nadsapa
 pina Dio huati tajarissa najaro
 tohuini madijari. Nama nadsapa

dsama huapimacca abi tojajari-paja. Pina pohuadsa Dio huati tapojarissa najaro: –Tipotemanipa tohuapihitohui, pina abadsico bedi huapi tajarissa nahitohui –najari. ¹⁹Abarahaocca huajano 100 bacco tabote naraha Diodsa pajissa najaripa nebo najarajari. Pohua bodipa: –Odsoqueenicca huajira tani. Sara dsoqquenicca naqui huajira tani –najari. –Sara ejedeni cajinijinepi tossamoni –najari. Naraha Diocca huatinajadsapa pajissa dsanapojari. ²⁰Diocca huatinajadsa Abarahaopa: –¿Pajissaqui? Pajissa jeranitime –najarajari. –Diojinepi pajiranissa tanitohui –nadsana pocca jeheniji deni tojadsanapojaro. Diodsa huatidseri dsanapojari. ²¹Abarahao pohua bodidsa nahato tajaripa: –Dio pocca huatinaja pajiranissa tajaropi dacorehe cajijari –najari. ²²Najarojinea Dio: –Abarahaopa ohuadsa bica tahi –najaripaja.

²³Abarahaopa Diodsa pajissa nadsa Diopa pohuadsa: –Bica tinani –najari dsodo napojaropi Abarahao pohuadsa ojari-gerani. ²⁴Najaro imapi iadsa naqui dsodo najaro. Ia naqui ia Medsede Jeso Nahatonide Diodsa pajissa inadsapi Pohuapa iadsa: –Bicaququiri tiquinani –najari. ²⁵Diopa Pohua Bedi da inadsa dsoqquejari, icca imasiri manaconi. Inahatonijaripa iadsa: –Imasiri ticappiramanani –nahijine.

Jesojine Dio tedseje icajonerajaro

5 ¹Ia Medsede Jesocristo itohui dsoqquejaricca imadsa pajissa inadsapi Diopa: –Tiadenidsa ima

nohuerani –najari. Najaroa aji Dio tedseje icajonerajaropaji. ²Cristo-dsa pajissa inadsapi pohuajine Dio iadsa catidse tahi. Najaroa aji Dio Pohuadsa disseraqquri inajaropaji. Nidsa Dio dsamarihuajipi pocca deni tojehe iadsa tojanitohui inadsa ehetidse najaro. ³Naraha itedsejemacca ima bicanidsaha etidseni ojari-gerani. Aji ocasserani ejarodsa naqui etidsenijine. Ajijaro ima nahatoto inani: Ocasserani ejaropi denima idacocorani nanijine, ocasserehe tonahanade iattanijine. ⁴Idacocorani nadsapi Diopa: –Tijinedeni bica tani –najari. Nadsapi ijine Diodsa bica tani nahatoto inadsapi *itedsejemacca ima bicani iadsa tojanijine naqui ibodidsa ahuato tajaropaji. ⁵Aji itedsejemacca ima bicani tohuini imadijaropi maidsehe tojajeranitohui. Dio Pohua Corime iadsa da inajaripa ibodidsa pocca tohuati huanehe inananissa tajararo.

⁶Iapi ijine icassiejeranijine ipajirajeradsapi tohuati nahanaququiri inapode. Naraha Dio ima inanajorapojarocca huada bacco tadsa Cristo dsoqquejaripa madija imasiri sseqquiri najaridenicca imasiri manaconi dsoqquejari. ⁷Madijapa pohua tessedsa ima oppina tehe tojadsa pohuadsa: –Dsoqquena –quinadsa pohua tesse tossiajahijine: –Ohuara odsoqueuena –nahijinepa cappina tahi. Pohua ccaccoraja, pohua ccaccora-jaraja nahitime. Naraha pohua tesse maderi bica taraha pohuadsa: –Dsoqquena –quinadsapa najari tossiajahijine madija ojari ojari naha pohua ccaccora tahi. ⁸Naraha Dio iadsa huati cahanari canahi

nahatoqquri inanijinepi imasiri ssequiri inaraha Cristopa itohui pohua ccaccorajari. ⁹ICca imasiri manaconi Cristo emene toccajaro-jinena Dio iadsa: –Jidapapi ticcadeni ima ohuadsa tobicani –najari. Nidsa pocca najidsohuecca huada bacco tadsapi ima bicani denima icajinitohui. Pocca najidsohue iadsa ssonari-jezanitohui. ¹⁰Tahide imasiri icajie imadipodsapi Dio tedseje icahadirehe imadipoccade. Nema inadsa imadiporaha Dio Pohua Bedi icca imasiri manaconi dsoquedsana Dio Pohua tedseje icajonerajarpaji. Jidapapa Cristo nahatonia camitta taha madidsapa ia tonassiajabaqquihitohui, inajaro. ¹¹Najaro ima bicania iadsa ojari-jezani. Diodsa naqui huatidsehe imeni icajini. Ia Medsede Jesocristo-jinena Dio tedseje icajonerajaro.

Adana Cristo tedseje tahimarideni

¹²Dsama nahatoponipa Adanaha madipojari. Adana pohana ibohuedsa imasiri inanapojaro. Adanapa ojari naha madiporaha pohuajine madija huapimadsa imasiri dsapa teje najonaponi najaropaji. Najaria aja madija huapima imasirima madi-jonamanadsapa jadahi tocjamanadsa huatiamanaja najonapohui najaripaja. ¹³Imasiripi Moisesicca marinaja nohueraccadsama tahide madija imasiri inanaridsamanapojaro. Aji Moisesicca marinaja nohueraccadsapi madijadsa: –Imasiri ticajini –quinahijine nohuera-ccani. ¹⁴Naraha nema nehe Adana madipodsama imasiri inanamanajarodenipa dsoqqehe inahana-jonamanajaroa aji Moisesicca

marinajadsa bacco toquinajaripaja. Adana natti madimanajaridenijinepi pina Adanajine imasiri tojajarossa nejeraraha nama naha imasiri caji-manajari.

Adanapa madija ohuaha dsotode ccajonahijine tahimari ahuato inanapojari. Najaripa Diocca daniji Jesocristo. ¹⁵Naraha Adanacca danijipi pina Diocca danijissa nejerani. Adanapa ojariraha pocca imasirijine aji huapima eheta najaropaji. Diopa madijadsa huati cahanari canadsa manaconi jirehe icca ima tobicanijine pocca ejedeni Jesocristo da inajari. Pohuapa ojari-rahua pohuajine camittehe icajijaro. ¹⁶Diocca danijipi pina madija ojariacca imasirissa nejerani. Adanacca imasiri ojari napodsapi Dio madija huapimadsa: –Imasiri ticajiridsamanani. Nanajidso tiquejenanitohui –najari. Madijapa imasiri ssequiri naraha Diocca daniji-jinena huapimacca imasiri jicaridsajaro. Nadsapa Dio madijadsa: –Tiadenidsa ima nohuerani –najari.

¹⁷Madija ojariacca imasirijinea eheta najaropaji. Dsoqqehupi ajijaro dsama nemanehedsa dacorajaro. Huapimadsa deni tojajaro, pina tamine deni tojajarissa najaro. Najaro imassa naraha ima denima bica tajaropi madija ojaria Jesocristona pocca madijadsa camittehe dsati da inajaro. Nadsapa pohuadenina dsoqqehedsa deni toquejenajari. Nama quinahijinepa Dio pohuadenitohui huati cahanari canadsa poccadeni ima manaconi jirehe inapajiranissa tajaro.

¹⁸Adanacca imasirijine madija huapimadsa najidsohue tojajaro. Najarossa najaro Jesocristocca ima

bicanijine madija najidsohuedsa dsori tocanirejari. ¹⁹Madija ojaría Diodsa ibo tadsapa madija huapimadsa imasiri tojaridsajaro. Naraha madija ojaría Diodsa ibora tadsapa pohuadsa pajissa quinajaridenicca imasiri Diojine jicaridsajaro. Pohuadenidsa Dio Attia: –Jidapapi ohuadsa bicaqquri tiquinani –najari.

²⁰Dio pocca dosseniji Moisesidsa da inajaropi madijacca imasiri pohuadenidsa denima ahuato tanijine. Nadsapi imasiri denima inanamanaraha Diocca tohuati huanehena deni tojajaro. Diopa madijadsa huati cahanari cadsanapojari. ²¹Imasiri dacorajarojinea aji ehétia najaropaji. Naraha Diocca tohuati huanehe denima dacoradsapi Dio pohua icadosse-dsa ia Medsede Jesocristojine icca imasiri jicajaro. Nadsapi icca ima Diodsa tobicajaro. Ia Medsede Jesocristojine camittehe jiquejeranicca icajidsanaponitohui, inajaro.

Cristodsa ijariqquijarocca ima

6 ¹Aji ima imittajaropi madija imasiri denima inanamana-
raha Diocca tohuati huanehena
madijadsa denima dacorajaro.
Nadsama ¿iapi nejecoma inanijine?
Diocca tohuati huanehetohui
inadsapi ¿imasiri inananijinequi?
²¡Poni! ¡Imasiri inana-jerana!
Pina aja madija dsoqquedsa ima-
siri ssamo tajarissa inajaro. Nema
inadsapi ¿imasiri inananapona-
nijinequi? Nohuerani. ³¿Totopacca
imapi nahatoqquri tiquinejera-
jaroqui? Totopa icajidsapi Jeso-
cristo pohuadsa ijariqquijaro. Pina
pohua tedseje ecotajarossa najaro.

⁴Passodsa ia topa idsanamanadsapi
pina Cristo tedseje ia ppa idsa-
manajarossa najaro. Aja Cristo ppa
idsamanaraha Abi Dio pocca deni
tojehe bicabotema Cristo inahatoni-
jari. Ia naqui Cristo pohua tedseje
ecotaraha pohua tedseje inahatoni-
jarossa najaro. Najaroa aji madie
dsati icajijaropaji.

⁵Cristodsa ijariqquijaropi pina
pohua huatiajarissa inajaro. Cristo
nahatonidsa naco pina pohua
tedseje inahatonijarossa inajaro.

⁶Ajjijaro ima nahatoqquri inajaro:
Icca madie jadani naqui pina Cristo
ahua porimacossanidsa huatia-
jarissa najaro. Najaro jicadsapi ia
tohuini inanicca tabaccorehe naqui
jicajaro. Iadsa ajimani tojadsapi
pina ia dossedessa napoma-jerani.
Nema nadsapi imasiridsa imadi-
dsanapo-jeranitohui. ⁷Pina madija
dsoqquedsa imasiri denima inana-
nijine ssamo tajarissa inajaro.

⁸Cristo pohua tedseje ecotajaropi
pajissa pohua tedseje imadinitohui,
inajaro. ⁹Iapi nahatoqquri inani:
Cristo huatiaraha nahatonijaripa
huatiapoma-jarahitohui, inajaro.
Ehetia najarocca imapi dacora-
raha Cristodsapi dacora-jerani.
¹⁰Cristopa dsoqquehi ojari naraha
najarodsa imasiricca dacorehe
pohuadsa jicanissa tani. Nadsapa
camittemanidsa Diocca deni tojehe
ahuato tanijine madijari. ¹¹Nadsama
iapi ibodidsa ajima inana: Pina
ecotajarossa nadsana imasiricca
dacorehe iadsa jicani. Jidapapi
Jesocristodsa ijariquidsapi Dio
Pohua tohui nahiccara inana-
nijinena imadijaro.

¹²Aji imasiripi tessiredeni
dsoqqeque tanicadsa dossed

dacorajaro. Tabaccorehe tinanamani-jine tiadeni dosse dosse najarossa najaro. Najarodsa poni tiquinaji, timedenidsa tohuini tiqinanicca tinanamana-jeranjine. ¹³Tessiredeni ima tabaccora taniccasda teccoramana tejeraji. Tessiredeni Diodsara teccoramanaji. Tiadenipi pina madija dsoqqe-
raha nahatonidsa madijarissa tiquinajaro. Nadsapi tessiredeni ima bicanidsana teccoramanaji. ¹⁴Nema tiquinadsapi imasiri tiadenidsa dacora-jerani-tohui. Jidapapi Moisesicca marinajadsa timadimana-jerani. Diocca tohuati huanehedsana timadimanajaro.

**Madijacca dodosse tabaqqi
toquejenajaridenicca ima
tadsajani mari icanabaqquijari**

¹⁵Jidapanapi Moisesicca marinajadsa imadi-jerani. Diocca tohuati huanehedsana imadijaro. Nema inaraha ¿imasiri inanani bica taqui? Bica tejerani. ¡Poni! Nema inejerana. ¹⁶Tiadenipi nahatoqquri tiquinajaro. *Madijacca dodosse tabaqqi tiquejenadsapi pina tiadeni dossede attissa tinanamani-jine pohnadsa tiadeni teccoramanajaro. Tiadeni dossede attidsa iboraqquri tiquinadsapi pocca dodosse tiquejenajaro. Najaro imassa najaroda tabaccorehe tinanamani-jine iboraqquri tiquinadsapi pina imasiricca dodosse tiquejenajarossa najaro. Nema tiquinadsapi paji tijicarinitohui. Naraha Diodsara iboraqquri tiquinadsapi Pohnadsa ima bicani tinanamana-dsanaponitohui. ¹⁷Ima bicani ticattejidsamanadsapi Diodsa ohuatidsedsa: –Jehe Abi Dio, tijine bica tani

–onajaro. Tahidepi pina imasiricca dodosse tabaqqi-
raha jidapapi Jesocristo tahimari tiadeni mari tocanabaqqimanasana ticcadeni huatidsehem
iboraqquri tiquinajaro. ¹⁸Nadsapi imasiricca dodosse tabaqqi-
ssa tiquinejerani-jine Dio tiadeni todinibaqqidsapa ima bicanidsara tidsepedeni ijimanajaro. ¹⁹Aji huati huati onajaropi timittamanani-jine najo tani onadsa ajijaro namicca ima tadsajani tiadeni mari ocana-
baqquijaro. Tahidepi tessiredeni huanehedsa teccoramanapojaro. Ima onih
i tabaccora tajarodsa naqui tessiredeni teccoramanadsapi pina imasiricca dodosse tabaqqi-
raha jidapapi Jesocristo-jine ticcadeni ima cacajiqquimerani. Tessiredeni ima bicanidsara teccoramanaji. Nani bicaqquri tiquinadsa Diotohuira timadimanadsanapodsapi pocca dossenijidsara iboraqquri tiquinani-jine.

²⁰Pina imasiricca dodosse tabaqqi-
raha jidapapi Jesocristo-jine ticcadeni ima cacajiqquimerani. Tessiredeni ima bicanidsara teccoramanaji. Nani bicaqquri tiquinadsa Diotohuira timadimanadsanapodsapi pocca dossenijidsara iboraqquri tiquinani-jine. ²¹Naraha imasiri tinanamani-jine pohnadsa tiadeni teccoramanajaro. Tiadeni dossede attidsa iboraqquri tiquinadsapi pocca dodosse tiquejenajaro. Najaro imassa najaroda tabaccorehe tinanamani-jine iboraqquri tiquinadsapi pina imasiricca dodosse tiquejenajarossa najaro. Nema tiquinadsapi paji tijicarinitohui. Naraha Diodsara iboraqquri tiquinadsapi Pohnadsa ima bicani tinanamana-dsanaponitohui. ¹⁷Ima bicani ticattejidsamanadsapi Diodsa ohuatidsedsa: –Jehe Abi Dio, tijine bica tani

ticajimana-dsanaponijine. ²³ Icca imasiri manaconipi dsoqquehe jiquejeranicca. Naraha Diocca danijipi camittehe jiquejeranicca. Ia Medsede Jesocristodsa iquejenadsapi Diocca daniji icajini.

**Cajicajicca imadsa mari
icanabaquijari**

7 ¹ Ohuemecotedeni, tiadenipi *Moisesicca marinaja nahatoqquri tiquinani: Madija madiccadsapa Moisesicca marinaja pohuadsa dacoraccani. ² Najaro ima ahuato tanijinepi cajicajicca imadsa tiadeni mari ocanabaquina, onajaro. Moisesicca marinajadsapi ajima najaro: Amoneje maqquideje cajidsapi ponicca maqqui madiccadspa pohuadsara madiccani bica tani. Najaro cajicajicca marinaja ponidsa dacoraccani. Naraha ponicca maqqui dsoqqedsapa cajicajicca marinaja ponidsa nohuerani, jicani. ³ Aja ponicca maqqui madiccadsapa maqquideje ohuaha inajadsapi ponicca maqquidsa imasiri inanajaro. Cajicajicca marinaja dsori inanajaro. Naraha ponicca maqqui dsoqqedsana cajicajicca marinaja ponidsa jicani. Maqquideje ohuaha cajinijine oppinera tani.

⁴ Ohuemecotedeni, tiadeni naqui pina Cristo tedseje ecotajarossa nadsapi Moisesicca marinaja iadsa dosse dosse napojaropi jicani. Jidapapi ia dossede marinaja onihi icajinijine bica tani. Nadsapi aja Cristo dsoqqueraha nahatonijaricca dodosse iquejenani. Nema nadsapi Diodsa idsepe ijiridsanijine bica tani. ⁵ Icca ima tabaccora tajaroma imadipodsa Moisesicca marinaja ia mari tocanabaquidsa imittaraha

najarojine imecca imasiri denima tohuatodsapi denima tohui ibodi huahuato naccade. Najaro imasirima imadidsapi dsoqquehe jiquejeranicca najidsohuedsa imadi-dsanaponijineraha. ⁶ Naraha jidapapi Moisesicca marinaja iadsa dacora-jerani. Ia dosse dosse naporaha jicani. Moisesicca marinajadsapi ecotajaro. Jidapapi Moisesicca marinajabotedsa Diodsa idsepe ijijerani. Dio Corimecca daniji icca madie dsatidsana Diodsa idsepe ijidsanapojaro.

Imasiripi iadsa madini

⁷ Jari, aji Moisesicca marinaja imittadsa ibodicca imasiri tohuatojaro onajaropi ¿Moisesicca marinajapi imasiri onajaroqui? ¡Nema onejerani! Pocca marinajadsa imasiri onananicca ima ohuattajaro. Pocca marinaja omitta-jeradsapi nassa imasiricca ima nahato onejeraneje. Imapi ajima najaro: Madija ohuaha dsepetaji tohuini onacomadsapi obodi: –Imasiri jerani –onaraha *Diocca dosseniji Moisesidsa da inajaro ojariepi: –Madija ohuaha dsepetaji tohuini tinacomamana tejeraji –nani omittadsapi nahato onajaro. ⁸ Moisesicca marinaja nohueradsapi imasiricca dacorehe ahuatoma-jeranitohuiraha. Naraha madija ohuaha dsepetaji tohuini tinacomamana tejeraji omittadsapi occa imasiri ahuatomajaro. Obodidsa tabaccorehe tohuini onajarojine onocods qqui onajaro tohuini ohonacoma najaro.

⁹ Tahide Moisesicca marinaja omitta-jeradsapi pina bica onadsa omadjarossa najaro. Naraha dsotode madija ohuaha dsepetaji tohuini tinacomamana tejeraji

omittadsapi imasiri onanani ohuadsa ahuato tajaro. Dsoqqeche jiquejeranicca naqui ohuadsa ahuato tajaro. ¹⁰ Moisesicca marinajajinepi camittehe jiquejeranicca ohuadsa tojanijineraha najaro dsori onanadsapi dsoqqeche jiquejeranicca ohuadsa tojajaro. ¹¹ Imasiripi mamaisadessa najaro. Moisesicca marinajadsa ohua camajadsaro. Omadi-dsanaponijinecca ima tohuini onaraha imasiripi dsoqqeche jiquejeraniccahuajina ohua tonanajaro.

¹² Moisesicca marinajapi bica tani, imasiri cappirani. Diocca dosseniji huapima Pohuajine pajiranissa tajaro, bica tani. ¹³ Naraha aji Moisesicca marinaja bicaniijine ¿dsoqqeche jiquejeranihuaji occanijinequi? Nohuerani. Imapi nema nejerani. Diocca dosseniji ojarie dsori onanadsa imasiri onanajarojinena dsoqqeche jiquejeranihuaji occanijine. Moisesicca marinaja bicaniijinepi imasiricca ima ohuadsa ahuato tajaro: Imasiripi oppina tani, tabaccora tajaro.

¹⁴ Moisesicca marinajapi Diocca daniji bicani nahatoqquri inajaro. Naraha ohuapi ohueme ocajie omadidsapi imasiri ohuadsa dacorajaro. Pina ohua dossedessa najaro. Poni tohuini naniccara onananiijine ohua cacadosse najaro. ¹⁵ Najaro obodi huatodsapi: –¿Njecotohui obodicca ima jidsa tajaro? –onajaro. Ohua jipa onanicca bica taniccara onana-jerajaro. Tohuajari nadsitaniccara onanajaro. ¹⁶ Ohua jipera onanicca onanadsapi ima ohuadsa ahuato tani: Moisesicca marinajapi bica tani. ¹⁷ Naraha aji ohua jipera onanicca onanajaroipi ohua motta ojine jerani. Imasiri obodidsa madidsajarojine ohua ocadossenijaro.

¹⁸ Ohuapi ohuadsa ima bicani nohuerajaro nahato onani. Ohueme ocajie omadije najaro imasiri sse onani. Ima bicani onananiijine tohuini onaraha nema onana-jerani. ¹⁹ –Ima bicani onanana –onaraha ima bicani onana-jerani. Ohuapi ima tabaccora tajaro tohuini onejeraraha tabaccorehe ohonana najaro. ²⁰ Nadsapi obodi huatojaro: Ohua jipera onanicca onanajaroipi ohua motta ojine jerani. Imasiri obodidsa madidsajarojine ohua ocadossenidsa nema onanajaro.

²¹ Obodi huatomadsapi ajijaro ima ocajijaro ohuadsa ahuato tani: –Ima bicani onanana –onaraha ima tabaccora taniccara onanajaro. ²² Obodipi Diocca dosseniji Moisesidsa da inajaro tohuini onani. ²³ Naraha ohuemepi ima onihicajijaro. Ohuemedsa imasiri dacorajarojine obodicca ima bicani tadsajani pina cahadirejarossa najaro. Imasiri deni tojadsapi pina poni dsapanidsa ojararossa najaro. Ohua jore naqquijaro. ²⁴ Jaho, tohuati nahana onaponi! Ohuemepi dsoqqeche jiquejeranihuaji ohua tohuaqqejeranijine ¿nejecjarina ohua dicca nahijine pajirahi? ²⁵ Ia Medsede Jesocristona ohua dicca nadsapa Diodsa ohuatidse: –Jehe, tijine bica tani –onajaro. Nadsama occa imapi ajima nani: Obodipi Diocca dossenijidsa ibora tajaro. Naraha ohuemenas imasiri onananiijine ibora tajaro.

Icca madie dsatipi Dio Corime ia mari tocanabaqquijari

8 ¹ Nadsama Jesocristodsa iquejenajaroipi Dio icca imasiri manaconi iadsa inassonari-jerani-tohui. ² Jesocristodsa iquejenajaroipi Dio Corimena ia dosse dosse najari.

Camittehe jiquejeranicca iadsa inadsapi imasiridsa imadi-jerajaro. Dsoqquehe jiquejeranicca ima naqui iadsa nohuerani. ³Najaro ima bicanipi Diojinena iadsa tojajaro. Moisesicca marinajajine jerani. Moisesicca marinajapi ecahuanissa tanijine ipajira-jerani. Madija iapi ibodidsa tabaccorehe tohuini inehe imadijaro. Najarodsa Diopa: –Tabaccora tani. Najarojine najidsohue ticajimananitohui –nanaja najari. Naraha najaro imasiri tomossinijinepi Dio Pohua Bedi dosse inaronajari. Pina madija essire icajjarossa naha cajidsapa pohua assiredsana icca imasiri manaconi Diojine ssonarijaro. ⁴Dio nama nadsapa pocca dosseniji bicabote inapajiranissa tehe imadinijine. Nema inanijinepi ibodicca tabaccorehe tohuini inejeradsa imadijaro. *Dio Corimecca dossenijidsana ibora inadsa imadijaro.

⁵Naraha Jesocristodsa toquejenajarajardenipa bodidenidsa tabaccorehe tohuini quinaha madimanageri. Najaria aja najaro tabaccorehe tohuira bodideni huahuatoma-manajari. Naraha aja Jesocristodsa toquejenajaridenipa Dio Corime pohuadenidsa madijaria aja Dio Pohua jipa tahicca ima tohuira bodideni huahuatoma-manajari. ⁶Naraha aja pohuadeni bodicca tabaccorehe tohu bodideni huahuatoma-manajari. ⁷Naraha aja pohuadeni bodicca tabaccorehe tohuini tiquinehe timadimana-jerani. Pajissa Dio Corime tiadenidsa madidsapa Pohuajine Dio jipa tahicca imatohuira timadimanani. Naraha madija Cristo Corime cappirajaripa Cristocca jarahi. ¹⁰Tessiredenipi imasirijine tidsoquemanaraha ticorimedenina madimanageri. ¹¹Diopa Jeso inahatonijaria Pohua Corime tibodidenidsa madijari. Nadsapa Pohua Corime tiadenidsa madijarijine Jesocristo Nahatonide Pohuana tessiredenidsa camittehe jiquejeranicca da inaridsanitohui. ¹²Ohuemecotedeni, ia dossede icajini. Najari. ¹³Tabaccorehe tohuini tiquinaniccadsa iboraquiquiri tiquina-dsapi dsoqquehe jiquejeranihuaji timadimana-dsanaponitohui. Naraha Dio Corimecca dossenijidsana iboraquiquiri tiquinadsapi tabaccorehe tohuini tiquinajarocca tinajicamanajaro. Nadsapi camittehe jiquejeranihuaji timadimanadsanaponitohui. ¹⁴Huapima Dio Corimecca dossenijidsa iboraquiquiri tiquina-dsapi Diocca ejedeni tiquejenani.

⁷Aja pohuadeni bodicca tabaccorehe tohu bodideni huahuatoma-manajari. Dio ihicahadimana najari. Pocca marinajadsa iboraquiquiri nahijinepa ssamoquiquiri nahi.

⁸Madija pohuadeni bodicca tabaccorehedsa iboraquiquiri najaridenipa Dio inahatidsemanaha najarahi.

⁹Naraha tiadenipi tibodidenicca tabaccorehe tohuini tiquinehe timadimana-jerani. Pajissa Dio Corime tiadenidsa madidsapa Pohuajine Dio jipa tahicca imatohuira timadimanani. Naraha madija Cristo Corime cappirajaripa Cristocca jarahi. ¹⁰Tessiredenipi imasirijine tidsoquemanaraha ticorimedenina madimanageri. ¹¹Diopa Jeso inahatonijaria Pohua Corime tibodidenidsa madijari. Nadsapa Pohua Corime tiadenidsa madijarijine Jesocristo Nahatonide Pohuana tessiredenidsa camittehe jiquejeranicca da inaridsanitohui. ¹²Ohuemecotedeni, ia dossede icajini. Najari. ¹³Tabaccorehe tohuini tiquinaniccadsa iboraquiquiri tiquina-dsapi dsoqquehe jiquejeranihuaji timadimana-dsanaponitohui. Naraha Dio Corimecca dossenijidsana iboraquiquiri tiquinadsapi tabaccorehe tohuini tiquinajarocca tinajicamanajaro. Nadsapi camittehe jiquejeranihuaji timadimanadsanaponitohui. ¹⁴Huapima Dio Corimecca dossenijidsa iboraquiquiri tiquina-dsapi Diocca ejedeni tiquejenani.

¹¹Diopa Jeso inahatonijaria Pohua Corime tibodidenidsa madijari. Nadsapa Pohua Corime tiadenidsa madijarijine Jesocristo Nahatonide Pohuana tessiredenidsa camittehe jiquejeranicca da inaridsanitohui.

¹²Ohuemecotedeni, ia dossede icajini. Najari. ¹³Tabaccorehe tohuini tiquinaniccadsa iboraquiquiri tiquina-dsapi dsoqquehe jiquejeranihuaji timadimana-dsanaponitohui. Naraha Dio Corimecca dossenijidsana iboraquiquiri tiquinadsapi tabaccorehe tohuini tiquinajarocca tinajicamanajaro. Nadsapi camittehe jiquejeranihuaji timadimanadsanaponitohui.

¹⁴Huapima Dio Corimecca dossenijidsa iboraquiquiri tiquina-dsapi Diocca ejedeni tiquejenani.

¹⁵Dio Pohua Corime tiadenidsa inanajaripa bica tajari. Puhujine Diocca huadie noppineni ticappinamananijine jarahi. Pina madijacca dodosse toquejenjarideni puhuadeni dossedecca huadie noppineni cappinamanajarissa tiquinanijine jerani. Dio Corimejinea Diocca ejedeni iquejenajaropaji. Puhujine naqui Diodsa: –Abi –inajaro. ¹⁶Dio Corimejinena ibodidsa ima ahuato tajaro: Pajissa Diocca ejedeni iquejenajaro. ¹⁷Nadsama Diocca ejedeni iquejenadsapi pocca daniji bicani iadsa tojanitohui. Huapima Diojine pocca ejedeni Jesocristodsa toजारopoi iadsa naqui tojanitohui. Pajissa Cristo puhua tedseje ocasserani edsapi nidsa dsotode pocca cacahueheda sacco inadsa puhua tedseje pocca deni tojehedsa ia naqui imadinitohui.

**Diocca deni tojehe Puhua
dsibehinema qqui inanitohui**

¹⁸Ohua obodi huatodsapi ajijaro namidsa imadidsa ocasserani eraha najaropi jicaca tani. Nidsa memehujina Diocca deni tojehe Puhua dsibehinema qqui inahitohui. Pocca deni tojehe iadsa tojanitohui. Najarona iadsa denima bica tajaro. ¹⁹Dio inahatoridsajari huapimadsa Diocca ejedeni iquejenajaro ahuatoqquri inanijine ia qquidepa najoramanahi. Pocca nahatonaja huapimapa najaro qquide tohui inacomamanajari. ²⁰Aja Dio inahatoridsajari huapimapa poccadeni biquehe onihi onihi cajiridsamanaporaha poccadeni ima totabaccorajaropoi puhuadenijine jerani. Aja Dio Pohua inahatoridsajari huapimapa Puhua

inajidsoridsajari. Puhuadenidsa najidsohue ssonari, comehe ssonari, dsoqqehe ssonari najaropaji. Naraha poccadeni ima tobicanijine tohuini madimanajari. ²¹Nidsa Dio pocca ejedenidenidsa pocca deni tojehe inanaridsadsapi dsoqqehecce dacorehepi jicanitohui. Najaro deni tojehe Puhua inahatoridsajaridenidsa naqui inanaridsadsapi dsoqqehe tappa inabaqquihitohui. ²²Nahatoqquri inani: Dio inahatoridsajari huapimapa pina amoneje ejedeni comene johua johua najarossa quinaha ocasserani ahuajonamanajaria jidapana ajijaropaji. ²³Iapi Dio Corime icajiraha ajijaro namidsa nahatoridsajarideni tedseje ocasserani eccani. Aji Dio Pohua Corime iadsa da inajaropoi nidsa dsotode ima bicani icajinijine nahatoqquri inani. Naraha najaro ima bicanitohui imadidsapi icca ojiema imadiccajaro. Nidsa dsotode najaro ima bicani iadsa tojadsapi Dio Puhujine pocca ejedeni iquejenajaropoi huapimadsa ahuato tanitohui. Puhujine naco essire cacajiquimeradsapi dsati tojanitohui. ²⁴Jesocristodsa pajissa inajaropoi tossiejehe icajini. Nadsapi *itedsejemacca ima bicanitohui imadijaro. Najaro qqui inadsapi denima tohuini inejeranitohui. ²⁵Naraha aji tohuini imadijaro qqui inejeraccadsapi mohuaradsa najarotohui imadijaro.

²⁶Jehe, ima bicani tohuini imadidsapi ia acco camajaro. Najarossa najaro ocasserani edsa icca jeheniji tojaparidsapi Dio Corime ia acco cama tahi. Diodsa huatide inassamoqquidsa naqui Dio Corime puhua ssa tocanacossadsa Diodsa

atti jiraha icca ima huati toquima tahi. ²⁷Diopa ibodi qqui taridsahi. Pohua Corimecca huatinaja nahato tajari. Pohua Corimepa Dio Pohua jipa tahicca nahato tadsa pocca ejedeni iquejenajaro icca ima Pohuadsa huati tahissa tataja najari.

Diocca deni tojehe icajinitohui

²⁸ Icca madiesapi ima onihi onihi naridsajaro. Ima ocassera tanicca naqui iadsa bacco bacco najaro. Naraha Dio Pohuajine ima huapima iadsa toजारocca tassa-qquidsapi iadsa ima bicani tojanijine nahatoqquiri inajaro. Aja Pohuadsa huatideni huanaqquiri najarideni huapimadsa nema inananitohui. Najaridenidsa huahua najari, pina Pohua bodi: –Ajima onanana –napojarissa inanjaro. ²⁹Diopa najaridenidsa tahide nahato tapojari: –Pohuadenipa pina occa ejedenissa onanabaquihitohui –napojari. Najaria aja Dio Pohua Bedipa imecotedeni huapimacca ato toजारipaja. ³⁰Dio Attipa: –Occa ejedenissa onanabaquihitohui –napojaria aja pohuadenidsa huahua najaripaja. Dio huahua inabaquijari Jesocristodsa pajissa quinadsapa Dio Attipa: –Poccadeni imasiripi jicaridsani –najaripaja. Poccadeni imasiri jicaridsajaridenidsa pocca deni tojehe inanaridsajaro.

³¹ Ajijaro ima imittadsapi: –Jehe, ima bicani icajini –inajaro. Dio iadsa jipa tadsapa aja madija iadsa jiperaqquiri najaridenicca imapi ponima toजारo. ³²Diopa pocca ejedeni Jeso iadsa eccoccojarajari. Icassiejeranijine eccoradsa dsoqqejari. Pocca ejedeni iadsa

da inadsapa ¿pocca biquehe onihi onihi iadsa eccoccopadseje? Nohuerani. Huapima iadsa da inaridsanitohui.

³³ ¿Nejecojarina Dio icattejidsabaquijaridenidsa: –Ticcadeni ima bica tejerani –nahijine pajirajari? Ssamo tahi. Dio Attipa: –Jesocristodsa pajissa quinajaridenicca imapi ohuadsa pajiranissa tani –najari.

³⁴ ¿Nejecojarina Dio icattejidsabaquijaridenidsa: –Najidsohuehuaji ocasserani ahuamanahitohui –nahijine pajirajari? Ssamo tahi. Jesocristopa itohui pajissa dsoqqejari. Najarina pajissa nahatonijari. Toccamacossanidsapa Imehi Dio inori nahatonihuaji huittarijari. Nahihuaji huittaridsa Imehidsa huati huati nanaja najari, ia tohuacahuabaquihijine. ³⁵ ¿Nejecojarina Cristocca tohuati huanehe iadsa inahuajinijine pajirajari? Nohuerahi. Cristo iadsa huati huana tadsapa iadsa apaja najarahitohui. Ocasserani edsa naqui Cristopa itohui huati cahanari cadsanapojari. Ima najo taniccadsa naco Cristopa itohui huati cahanari cadsanapojari. Nanajidso iquejenadsa, pemi imadidsa, iccoroje imadidsa, oppinehema imadidsa naqui Cristopa itohui huati cahanari cadsanapojari. Idsoqquedsa naqui Cristopa iadsa nama dsanapojari. ³⁶Dio Atti dsodo nanidsapi ajima najaro:

–Dio, ticca imatohui disseraqqquiri inadsapi madija huajjiradsa ia jara jara quiquinanahi, ijicanijine. Iapi pohuadenijine pina edede bani tojahijine dsodsoqqe nahihuaji iaccamanajarissa inajaro

–nani nade Dio Atti dsodo nanidsa.

³⁷Najaro ocasserehe onihi onihi naridsajaro huapima iadsa ssonari-raha Cristo iadsa huati cahanari canadsapa iana deni iquejenajaro.

³⁸Ajjaro imapi obodidsa nahato onani: Dio iadsa huati cahanari canadsapa ima onihi onihi najaro-jine Diocca tohuati huanehe iadsa inahuajinjine ssamo tani. Idsoqqe-dsa naqui ¿Diocca tohuati huanehe iadsa amossi napadseje? Diopa iadsa huati huanadsanapo tahi. Aji imadidsa naqui ¿Diocca tohuati huanehe iadsa amossi napadseje? Diopa iadsa huati huanadsanapo tahi. Aja Diocca dodosse tabaqquideni naco ¿Diocca tohuati huanehe iadsa inahuajimananijine pajiramanaco? Ssamooquiri nahi. Ajijaro dsamacca dacoraqquri najarideni naco ssamooquiri nahi. Satana naco pocca dodosse tabaqquidenima ssamooquiri nahi. Jidapanacca ima naqui ssamo tani. Itedsejemacca ima naqui ssamo tani. ³⁹Memehuaji madimanajarideni naco ssamooquiri nahi. Odi bodi huaji tanihuajicca naco ssamooquiri nahi. Dio inahatoridsajari ohuaha ohuaha quinajarideni naco Diocca tohuati huanehe iadsa inahuajimananijine nohuerahissa tahi. Ia Medsede Jesocristo itohui dsoqqejarinjine Dio iadsa huati cahanari canahi ahuato inanajaropaji.

**Diopa Isaraeri potemahi
pocca madija toquejenahijine
icattejidsabaqquijari**

9¹ Cristocca madija ojadspaji pajissara huati onajaro. Omaidsa-gerani. Dio Corimejine obodi nahato tadsa pajissa huati

onajaro. ²Obodi qquedsehe omadi, obodi coma tehe omadi najaro.

³Occa madija jodiodeni Jesocristodsa toquejenahijine tohuini onadsapi ohuara ohua ohuaccoradsa Diocca huadie ohuadsa ssonarina, onabote nani. Occa madija tocassiejerahijine Cristodsa epeje onadsa najidsohue jiquejeranihuaji ojanijine bica tani, onaraha ssamo tani. ⁴Occa madija jodiodenipa idi *Isaraeri potemahi. Najaridenina Dio pocca ejedenissa inanabaqquijari. Dio pocca dacorehe, pohua dsibehinema pohuadenidsa madiridsajari. *Dio pohuadeni tedseje jehe canirejari. Pocca dossenijidsa madimanahijine Moisesidsa huati tajari. Dio Pohuadsa huatidsemanahijine naco mari icanabaqquijari. Pohuadeni tedsejemacca *ima bicani huapi tani huati tapojari. ⁵Occa madija jodiodeni potapojari-denipa Abarahao, Isahaca, Jacobo quinajari. Najarideni potemahidenidsana Cristo-Mesia tossohajari. Pohuapa Dio. Huapima Cacahuade tohajari. Pohuadsa etidsedsanaponijine bica tani. Pajissa nema nana.

⁶¿Naraha Dio Pohua huati tapojaricca ima bicani pohuadenidsa inapajiranissa tejerajaroqui? Nohuerani. Imapi ajima najarona paji: Isaraeri potemahi huapimapa pajissa Diocca madija quejenajarahi. Motana Dio pocca madija. ⁷*Abarahao potemahi huapima naco pocca ejedeni pajissacca quejena-jarahi. Motana pocca ejedeni pajissacca quejenajari. Diopa Abarahoadsa huati tapojari: –Ticca ejedeni Isahaca potemahidsana: “Tia tipotemani” onanitohui –najari Dio. ⁸Najaro ima imittajaropi: Abarahao

potemahi huapimapa Diocca madija toquejena-jarahi. Aja Dio huati tadsa tossonajari potemahidsana: –Occa madija –najari. ⁹Aja Dio Abarahaodsa huati tapojaripa ajama najari: –Huajano ohuahadsa occa-jonapomadsana ticca amoneje Sara ejedeni cajinitohui –napojari.

¹⁰Nadsapa Saracca ejedeni Isahaca pocca amoneje Rebeca icajidsa inajidsapi idsonidsa ejedeni papamade cajijaro. Imehidenipa icca idi Isahaca pohua ojarihi. ¹¹⁻¹²Ejedeni papamade tocatoya-jaraccadsapa ima bicani inanamana-jeraccani, ima tabaccora tanicca naqui inanamana-jeraccani naraha Diopa pohuadenei tedsejemacca ima Rebecadsa huati tapojari: –Tahidecca tossonajaripa dsotodeccadsa medse tojahitohui –napojari. Dio Pohua jipa tahicca inanaridsanijine madija icattejidsabaquijari. Tohuideni huahua najaripa madija pohuadenei inamanajarojine jerani. ¹³Dio Atti dsodonanidsapi ajima najaro: –Ohuapi *Jacobodsa ohuati huana tajaro. Esahopa ohuattajojari –nahi nade Dio.

¹⁴Najaro ima imittadsapi ¿ibodidsa nejecoma inani? Dio pocca tocattejidsaniji pajiranissa tejerani ¿inanijinequi? ¡Nohuerani! Diojine pajiranissa tani. ¹⁵Diopa Moisesidsa huati tajari: –Ohua madija ocattejidsabaquijaridenidsana occa acco camehe onanaridsanitohui. Najaridenidsana ohuati huana tanitohui –najari. ¹⁶Dio iadsa huati huana tajaripa ia tohuini inajarojine jerani, idsepe ijinnissa tajarojine jerani. Dio Pohua huati huana tajarijine. ¹⁷Pina dsama Ejitocca tamine icattejidsajaricca imassa

najaro. Dio Atti dsodo napojarodsa ima anijaro. Diopa taminedsa ajama napojari: –Tiadsa ossonaridsa occa dacorehe ahuato onananijine tia tamine onanajaro. Nema onajaropi dsama huapimadsa otahimari mittaridsamanahijine –nahi nade. ¹⁸Najaro imadsapi iadsa ahuato tani: Dio Pohua jipa tadsa madijadsa: –Occa –nadsapa najaridsana huati huana tajari. Naraha Dio jipera tadsa madijadsa: –Occa –najaradsapa Pohuajine madija paja tohuiborihi dsanapo tahi.

¹⁹Najaro ima nahatoto tinadsapi ajima tiquinanitide: –Dio Pohua jipa tahicca ima madijajine cacajiquimerani ssamo tadsapi ¿nejecotohui Diopa Pohuadsa iboqquri najaridenidsa: “Ticcadeni ima tabaccora tani” nanaja najari? –tiquinanitidija. ²⁰Naraha nema tiquinejeraji. Tiadenipi madijaraha ¿nejecotohui Diodsa tettideni nema najaro? Ajina dsipapi attini caji-jeraraha poni nanahatodedsa: –¿Nejecotohui ohua tinahatodsa ajima onajaro? –¿nanijinequi? ²¹Naraha dsipa nanahatodena ssiqui jarorodsa pohua jipa tahicca ihinahato najaro. Najaro ssiqui



jarorodsa dsipa bicani inahato, dsamatapa tabottojine inahato naneje najaro.

²²Dio naco pina dsipa nanahatodessa naha Pohua jipa tahiccara ihinana najaro. Ajana Pohuapa: –Madija Ohuadsa iboqquri najaridenidsa occa huadie onassonarina, nani occa dacorehe ahuato onananijine –najari. Najari-deni nanajidso toquejena-dsanapohuijine inanajorabaqquijari. Diopa nama nahijine jipa taraha pohuadeni inajidsobaqquihijine najoccahi. *Mohuaradsa poccadeni imasiri inahanaccani. ²³Pohuapa najocca dsama iadsa huati canahari canadsa ia tonassiajabbaqquihijine ia tonanajora-baqquijari. Pocca deni tojehe, pocca biquehe iadsa ahuato inananijine tohuini nadsa nema inanajaro. ²⁴Ia motapi jodiodeni iquejenajaro, motapi jodio tiquejenajerajaro huapima Dio pocca madija iquejenanijine ia huahua tabaqquijaripaja. ²⁵Najaroa aji *Dio Atti cacomerabote Osea dsodo inapojarodsa ima ajima najaropaji:

–Occa madija quejena-jarajaridenidsa: “Occa madija” onanitohui.

Pohuadenidsa ohuati huanera tajarossa naporaha pohuadenidsa ohuati huana tanitohui.

²⁶Nadsapi pohuadeni madimana-hihuaji pohuadenidsa: “Occa tiquejena-jerani” onaporaha najaro dsamadsa pohuadenidsa: “Dio camitta tajaricca ejedeni tiquejenani” quiquinana-hitohui –napohui nade Dio Atti Osea dsodo inajaro. ²⁷Dio Atti cacomerabote

Isahiapa Isaraeri potemahi jodiodeni tahimari huati tapojari:

–Isaraeri potemahideni tohuapidsapa pina coridsa imenicca ssiqui potera tajarajo jiquejerajarossa quinahitohui naraha mota pamema nahana tocassiejerahitohui.

²⁸Aja Dio Pohua huati tapojaricca inanabote nani.

Dsama huapimacca madijadsa najidsohue inanadsapi Pohuajine pohuadenidsa pajiranissa tanitohui –nahi nade.

²⁹Isahia ima dsodo inapojaro naqui ajima najaro:

–Dio Dacorabote icca ididendi potemahi mota ecahuabaqquijaradsapa

iapi pina odsa panani

*Sodomacca madija,

Comoracca madija jicajarissa inanitohuiraha –nahi nade.

Jodiodenipa: –Icca marinaja ecahuadsapi Diodsa ibicanijine –quinaraha

³⁰Ima nema nadsapi ¿nejecoma inanijine? Tahide jodio quejena-jarajaridenipa: –Icca ima Diodsa tobicana –quinapo-jararaha Jesocristodsa pajissa quinadsapa Dio pohuadenidsa: –Ticcadeni imasiri ohuadsa nohuerani –najari. Nadsapi poccadeni ima Diodsa tobicajaro. ³¹Naraha Isaraeri potemahi jodiodenipa poccadeni ima Diodsa tobicanijine Moisesicca marinaja inapajiramananijine disseraqquri naraha pajiramanajarahi. ³²¿Nejecotohui jodiodenipa Diodsa tobicamana-jarajari? Pohuadenipa ima bicani inanamanajarodsa Diodsa tobicamanahijine

tohuini quinaraha najarodsa tobicamana-jarajari. Diodsa pajissa quinahissa tajarajari. Poccadeni imapi pina sibadsa madija cobara tocanirejarissa quinajari. ³³Najaropi Dio Atti dsodo napojarodsa ajima najaro:

– ¡Ticattomama canaji! Odsa panani *Siohuajipi siba ohuattajaro.

Najaro sibapi madija inehedi-mabaquihitohui.

Najaro sibadsa pajissa quinaridenipa nidsa dsotode ponicca mamaidsa tabaqqi toquejena-jarahitohui

– naponi nade Dio Atti dsodo nanidsa.

10 ¹Ohuemecotedeni, occa madija *Isaraeri potemahi jodiodeni tocassiejerahijine obodi tohuini onajaro. Dio inassiajabaquihijine Pohuadsa huati huati ohonanajaro. ²Ohuapi poccadeni ima nahato onajaro. Pohuadenipa Diodsa disseraqqiri naraha Diocca nahatohue pajissaccadsa bodideni huatohuissa tajarahi. ³Dio Pohua ojarijarina madijacca ima inanabicanijine pajirahi pohuadenipa ssamoqqiri najari. Poccadeni ima Diodsa bica tanijinepi poccadeni marinajadsara disseraqqiri najari. Naraha Dio madija inanabica-baquihijinecca imadsapa iboqqiri najari. ⁴Moisesicca marinaja huapimapi Cristo inapajiranissa tadsapi jicajaro. Nadsapa madija Jesocristodsa pajissa quinajaridenicca ima Diodsa tobicajaro.

⁵Aja madija poccadeni ima Diodsa tobicanijine poccadeni marinajadsa disseraqqiri najaridenicca imapi Moisesi dsodo inapojaro:

– Ajjaro marinajassa inanadsa madijaripa najaro marinajadsara madihitohui – nahi nade. ⁶⁻⁷Naraha icca ima Diodsa tobicanijinepi icca jehenijina paji. Pina Moisesicca dsodonijissa najaro tibodidenidsa ajima tiquinanitide: – ¿Nejecojari memehuaji toccamacossahijine pajirahi? ¿Nejecojari nami odini huaji tanihuaji jicapojarideni madimanahidsa toccaronahijine pajirahi? – tiquinaraha nema tiquinejeraji. Cristotohui memehuaji jajiamacossa-jerani. Jicapojaridenihuaji naqui jajaronajerani.

⁸Moisesicca dsodoniji onhipi ajima najaro: – Najaro ima tiadenidsa huajira tani. Tibodidenidsa ticajimanani, huati tiquinanijine tejeridenidsa najorani – nahi nade.

Najaro imapi Jesocristodsa pajissa inadsa icca ima Diodsa tobicanijine. Najaroa aji mari mari ihinanajaro-paji. ⁹Madijadsa tecomeramandsapi: – Jesopa ohua Medsede, occa tamine deni tojahicca – tiquinaji.

Tibodidenidsa naqui: – Jeso huatiraha Dio inahatonijaripa pajissa – tiquinadsapi ticassiejeranitohui.

¹⁰Ibodi Jesocristocca imadsa pajissa inadsapi icca ima Diodsa tobicajaro. Madijadsa ecomeradsapi: – Jesopa ohua Medsede – inadsana Dio ia tonassiajajari.

¹¹Dio Atti dsodo napojaro-dsapi ima ajima najaro: – Pohuadsa pajissa quinajaridenipa nidsa dsotode pocca mamaidsa tabaqqi toquejena-jarahitohui – nani nade. ¹²Najaria jodiodenipa, jodio quejena-jarajarideni tedseje najarissa caniquimera-jaripaja. Ia Medsedepa pohua ojarijari, huapima Medsededeni.

Madija pohuadsa huahua quina-jarideni accode jipa tajari. Pocca biquehe jiquejeranicca pohuadenidsa dade jipa tajari. ¹³Dio Atti dsodo nanidsapi ajima najaro: –Huapima ia Medsede onidsa huahua quinadsapa tocassiejera-hitohui –nani nade Dio Atti dsodo nanidsa. ¹⁴Naraha ¿nejecoma quinadsa pohuadsa huahua quina-hijine? Pohuadsa pajissa quina-jaradsapa pohuadsa huahua quina-hijine ssamoqquiri najari. ¿Nejecoma quinadsa pohuadsa pajissa quina-hijine? Pohua tahimari mittamana-jaradsapa pajissa quina-hijine ssamoqquiri najari. Naraha ¿nejecoma quinadsa pohua tahimari mittamanahijine? Pohuadeni maride cappiramanadsapa pohua tahimari mittamana-jarajari. ¹⁵Nadsapa ¿nejecoma nadsa pohuadeni maride tojahijine? Mamaride dossede nohueradsapa maride toja-jarahi. Najaroa aji Dio Atti dsodo napojarodsapi ajima najaro: –Madija ima bicani icassiejeranijinecca maride bacco nadsapa huatidsehe tojaridsani –nani nade.

¹⁶Naraha madija huapimapa icassiejeranijinecca ima bicanidsa pajissa quina-jarahi. Pina Dio Atti cacomerabote Isahia huati tajarissa najaro: –Ohua Medsede ¿nejecojarina icca imadsa pajissa najari? –napohui nade. ¹⁷Nadsama Jesocristodsa pajissa quina-hijinepa tahide pohua tahimari icassiejeranijinecca mittamanadsana pajissa quina-jari.

¹⁸Naraha ohuattipi: ¿Isaraeri potemahidenipa najaro ima bicani mittamana-jaraco? onaraha mitta-manahi. Dio Atti dsodo napojarodsapi ajima najaro:

–Najaro imapi dsama nemanehedsa mittaridsamanajari. Dsama huapima jicaqqunihuaji naqui bacco taridsajaropaji –nahi nade Dio Atti.

¹⁹Nadsapi ohuatti onihi naqui: ¿Najaro ima Isaraeri potemahidenipa bodidenidsa mittamanahissa tajaraco? onaraha nahatoqquiri nahi. Moisesicca dsodonijidsa Dio Attipa: –Isaraeri potemahi tiadenipinidsa ticcadeni madija quejena-jarajaridenidsa ohuati huana tani qqui tiquinadsapi tedimananitohui.

Madija ohuadsa ssamoqquiri najarideni ohuacahuabaqquihi qqui tiquinadsa naqui pohuadenidsa tedimananitohui –nahi nade.

²⁰Dio Atti cacomerabote Isahia naco cappinera tadsa Dio Atti ecomerajaro: –Madija ohuahadeni naco Otohui quina-jararaha Ohuadsa bacco toquinajari. Otohui quina-jararaha occa ima pohuadenidsa ahuato onanajaro –nahi nade Dio.

²¹Isahiapa Isaraeridenicca ima onihi Dio huati tadsa ecomerajaro: –Occa madija odinibaqquihijine huajjiradsa pohuadenidsa huahua ohonanaraha iboqquiri nahi.

Poccadeni ima nebomanahijine jiperaqquiri najari –nahi nade Dio.

Diopa Isaraerideni icattejidsabaqquijari

11 ¹Jari, huati onana: ¿Diopa pocca madija Isaraeridenidsa huattajo taco? Nohuerahi.

Aji ohuapi *Isaraeri potemahi jodio ojani. Occa idipa Abarahao. Najari jinodi Benjamin potemahicca madija ojani. ²Tahidedsama Diopa Isaraeri potemahidenidsa: – Occa madija – najonajaria aja jidapana pohuadeni ettajobaqqui-jarajaripaja. Dio Atti dsodo nanidsa Pohua Atti cacomerabote Eria tahimari nahatoqquri tiquinajaro. Maittaccadsama Isaraeridenicca ima bica tejeradsa Eria Diodsa huati tajari: ³ – Ohua Medsede Dio, ticca madija Isaraeridenipa Tetti cacomeraqquri najarideni inajicaridsamanahi. Aji siba hua tamaroni Tiadsa dada toqquimacca naqui itaboridsamanani. Ohua naqui ohua inanadsoqquemana-nijine tohuini quinaraha ohua motta omdiccani – nahi nade Eria Diodsa. ⁴Naraha Diopa Eriadsa huati tajari: – Madija mota 7 mil (7,000) quinaha ocajini, ohuattajobaqqui-jarajari. Pohuadenipa dio pohuamacca Bahao corimedsa huatidsemana-jarahi, pohuadeni pitodsa jassi jassi tajarahi – nahi nade Dio Eriadsa. ⁵Jidapana naco najarideni potemahi mota pamema naha Dio nebomana-jarajari. Diopa bica taja, huati huana taja najarijine icattejidsabaqquijari. ⁶Dio bica tajarijine icattejidsa-baqquijaripa madija pohuadeni inanamanajarojine jerani. Nassa pohuadeni inanamanajarojine Dio icattejidsabaqquidsapo ettipi: – Dio bica tajarijine – inejeranitohuiraha.

⁷Nadsama ¿Isaraeridenicca imapi nejecoma najarona paji? Pohuadenipa Diodsa bicaqquri nahijine tohuini quinaraha najaro ima bacco toquina-jarahi. Mota pamema naha

Dio icattejidsa-baqquijaridenina Pohuadsa bicaqquri najari. Motapa paja huaribodeni tosibarihi najari. ⁸Dio Atti dsodo nanidsapi ajima najaro:

– Diojine bodideni pina huada cojo tocanirejarissa quinajari. Noccodeni modsi inanabaqquijari, qqui toquina-jarahijine. Huaribodeni moda inabaqquijari, mittamana-jarahijine. Najaro ima huarijonajaropi jidapana ajijaropaji – nani nade Dio Atti dsodo nanidsa.

⁹Tamene Dabi naco najaro ima Diodsa huati tajari:

– Poccadeni jipaqquedsa huahuatidsemana naraha poccadeni jipaqquepi pina tajapadsa ppiro tocanirejarissa nana. Nahi tohuedimamanadsapa nanajidso toquejenahijine.

¹⁰Noccodeni todsidsi-dsanapona, qqui toquina-jarahijine. Idedeni jocadsamanaha nama dsanapomanana, ocasserani inahanamana-dsanaponijine – nahi nade Dabi.

**Jodio quejena-jarajari
tocassiejerahijinecca ima**

¹¹Jari, huati onapomana: ¿Jodiodeni tohuedima-manajarissa quinajaripa Dio paja ettajobaqqurihi najarico? Nohuerahi. Pohuadeni Diodsa iboqquri nadsapa aji icassiejeranijineccapi jodio quejena-jarajaridenidsana tojajaro. Najaro acconi Diojine jodiodeni huadimanadsa: – Ia naqui Diodsa iquejenani-pomana – quina-hijine. ¹²Jodiodeni iboqquri nadsa

poccadeni ima tossamodsapi madija ohuahadenidsana Diocca biquehe, pocca acco camehe tojaridsa-jaropaji. Nidsa jodiodeni Diodsa toquejenanihissa tadsapa madija huapimadsa ima bicani denima tojaridsanitohui.

¹³Naraha jodio tiquejenajera-jaro tiadenidsa huati onajaro. Diopa ohua cadossejari ohuadsa bica tadsa tiadeni maride dissera onajaro. ¹⁴Najarodsas occa madija motadeni ima bicani ticajimanani qqui toquinadsa: –Jaho, iadsa toja naccaraho –quinadsapa bodideni cacajiquimera-manahijine. Tossiejehe naqui cajimanahijine, onajaro. ¹⁵Jodiodeni huahuattajo toquejenajaripa Diojine madija ohuahadenira Puhuadsa cajonerara canajari. Nidsa jodiodenicca ima Diodsa tobicapomadsapi huatidsehe imeni tojanitohui. Pina madija huatiaraha camittemanijarissa quinahitohui. ¹⁶Ia jodiodeni icca imapi pina pancca imassa najaro. Trigo bono tahidecca pore quinapojariccadsa pan inahatodsapa sica nahi ime mota badsira taha Diodsa da da ihinanajari. Najari pan ime mota Diodsa tojadsapa namanaha naco Diocca tojajari. Ahua oribo jabo naco Diodsa tojadsapa inine huapima Diocca tojaridsajari. Nadsama icca idi potapojari Abarahaopa pina pan ime motassa, pina oribo jabossa najari. Puhuapa Diodsa tojadsapa pohua potemahideni naco Diocca toquejenajari. ¹⁷Jodiodeni motapa pina huadsajacca oribo ininessa quinajari. Caca huadepa oribo inine mota ca ippiridsadsa manaco dsamacca oribo ininera nepi icadsana-ridsajari.

Tiadeni Abarahao potemahi tiquejena-jerajaropi pina dsamacca oribo inine nepi cadsana-ridsajarissa tiquinajaro. Nadsapi oribo jabojinena camittaququiri tiquinajaro.

¹⁸Naraha: –Iana denima bicaququiri inajaro, jodiodenipa ajamani toquejenahi –tiquejejerana. Tibodideni huatoji. Tiadenipi oribo inine tiquejenani. Tijinedenipa oribo camitta tajarahi. Pohua jabojinena camitta tajari.

¹⁹Tibodideni ajima tiquinanitide: –Jehe, jodiodenipa pina oribo inine ca toppiridsajarissa quinajari. Dio ettajobaququidsapa iana pocca madija iquejenanijine ia nepi todsanabaququijari –tiquinajaro. ²⁰Nema tiquinajaropi pajissaraha tibodideni huatoji. Puhuadeni pajissa quina-jaradsapa huahuattajo toquejenajari. Tiadenipi pajissa tiquinajarojine Diocca tiquejenajaropaji. Nadsama ¡paji! –Iapi deni iquejenani –tiquejejeraji. Dio noppinera ticappinamanaji. ²¹Diopa oribo inine ca toppi-jarahijine poni najaradsapa ca toppia jicajari. Paji, tiadenidsa pina najaridenidsassa inanarana.

²²Nadsama tibodideni huatomanaji. Diopa huati huana tajari, bica tahi. Naraha Pohua naco najidso tahi. Puhuadsa iboququiri najarideni ettajobaququijari. Naraha tiadenidsa huati huana tajari. Pocca tohuati huanehedsara timadimandsanapoji. Nema tiquejejeradsapi pina ahua inine ca ippiridsajarissa tiquinanitohui. ²³Naraha jodio bodideni cacajiquimera-manadsa poccadeni ima pajissa quinajarajicca nebomanadsapa Diodsa toquejenani-pomahitohui. Dio

Dacorabotepa ahua oribo inine ca ippiridsapojari inaccanidsa nepi icadsanani-ridsapomahijine pajirahi. ²⁴Tiadenipi pina dsamacca oribo inine huidsajacca oribodsa nepi cadsana-ridsajarissa tiquinajaro. Naraha jodiodeni Diocca madija toquejenani-pomahijinepa Dio Pahuadsa denima bica tajaro. Pina huidsajacca oribo inine ca ippijari inaccanidsa pohua ededsa nepi icadsanani-ridsapomajarissa najaro.

**Isaraeri potemahi jodiodeni
naco tocassiejerahijine**

²⁵Ohuemecotedeni, ajijaro imapi tahide madijadsa ahuatora taporaha timittamananijine huati onana, nani tibodidenidsa: –Iapi deni iquejenani –tiquinejeranijine. Najaro imapi Isaraeri potemahi jodiodeni mota huapi taha Diosda tohuibomanajari. Naraha jodio quejena-jarajarideni tohuapihissa tadsana jodiodeni poccadeni ibohue nebomanahitohui. ²⁶Nadsana Isaraeri potemahi jodiodeni huapima tocassiejerahitohui. Najaro imapi Dio Atti dsodo napojarodsa ajima najaro:

–Nidsa odsa panani *Siocca ia Idinide ccajonahitohui.
Isaraeri potemahidenicca tabaccorehe inanamossinijine
–nahi nade Dio.

²⁷Pohua Atti onihí naqui ajima najaro:

–Nadsana pohuadeni tedseje jehe icanirejaro
onapajiranissa tadsapi poccadeni
imasiri onanamossinitohui
–nahi nade Dio.

²⁸Jodiodeni motapa pina Diosca huadidenissa quinacchahi.

Nema najaroa Jesocristo tahimari icassiejeranijinecca tiadenidsana tojajaro, ticassiejeranijine. Naraha Diopa jodiodeni potapojarideni icattejidsa-baquipojarijine pohuadeni potemahitohui huati huana tahi paja nacchahi. ²⁹Dio pocca danijipi idini-gerani. Madija huahua inabaquipojarideni naco inebobaquijari. ³⁰Tiadenipi tahide Diosda iboquiri tiquinapojaro. Naraha jidapana jodiodeni Pahuadsa tohuibomanadsapa tiadenidsana huati huana tajari. ³¹Diopa jodiodenidsa najarossa inanapomanijine. Jidapana Pahuadsa iboquiri najarijine pocca tohuati huanehe tiadenidsa baccho tajaro. Nidsa dsotode pohuadenidsa naqui pocca tohuati huanehe ahua to inana-pomanitohui. ³²Madija huapimapa najarissa caniquimerajari. Ibohue cajiridsamanadsapa Dio inebobaquijari, ibohuecca imadsa madimanahijine. Dio nama nadsapa huapimadsa pocca tohuati huanehe ahua to inananijine.

³³¡A, Diocca biquehepi jiquejerani! Pocca nahatohue naqui jiquejerani. Pohua bodicca huatohue imittanijine ipajira-gerani. Pohua inananicca naqui qqui qqui inaraha imitta-gerani. ³⁴¿Nejecojari ia Medsede bodi nahato tahi? Nohuerahi. ¿Nejecojari Dio bodi acco icamahijine pajirahi? Nohuerahi. ³⁵¿Nejecojari pohua cajijaricca Diosda da inadsa: –Dio ohuadsa debe nahi –nahijine pajirahi? Nohuerahi. ³⁶Memecca, namicca huapima aniridsajaripa Dio inahatoridsajari. Pocca dacorehedsa huapima ecahuaridsajari. Huapima aniridsajaridsa Diocca deni tojehe ahua to

tajaro. Nadsapi Pohuadsa: –Tiapi deni tijani, denima bica tinani. Aja Tiassa najari ohuahapa nohuerahi –ihidsanapo nana. Pajissa nema nana.

**ICCA MADIE DIODSA
ECCORAJARocca ima**

12 ¹ Ohuemecotedeni, Dio iadsa huati cahanari canahi ahuato tajaro. Najaro-jine ohuatti bica tadsa tiadenidsa huati onana, ohuattissa tinanamani-jine: Tiadeni tessiredenima Diodsa teccoramanaji. Tibodideni ssiaja, huire tadsa ticcadeni madie dsati Pohuadsa teccoramanadsapi Pohuatohuira timadimanaji. Nema tiquinadsapi tiadenidsa: –Jehe, ticcadeni daniji ohuadsa bica tani –najari. Najaropi Dio Pohuadsa pajissa tetidsemanajarocca ima pajiranissa tajaro. ² Jidapapi ajjaro dsama huapimacca imassa tinanamapoma-jeraji. Ajima tiquinanina bica tani: Tibodidenicca huatohue dsati tinanamanaji. Nema tiquina-dsapi ticcadeni madie cacajiquimerani-jine, Dio jipa tahicca naqui ticahatterani-jine. Najaropi bica tanicca ticahattera, Dio tinahatidsemanahijine ticahattera, pajirani-ssa tanicca tinanamanani-jine ticahattera nanitohui.

³ Dio ohuadsa huati huana tajaria ohua cadossedsa tiadenidsa huati onajaro. Ponima: –Deni ojani, ohuana nahato onani –tiquine-jeraji. Mohuaradsa Diojine nahatoto tinajarocadsa ticcadeni ima nattome tiquinaji. Jesocristodsa pajissa tiquinajaroma tibodideni huatoma-manaji. ⁴ Ia huapimapi essire imadijaro. Essire ojariedsa

huanaridsanipi huapi tajaro. Naraha huapima najarossa nejerani. Nahatohue onihi onihi nehe caji-ridsamanani. ⁵ Ia Jesocristocca iquejenajaro naqui najarossa inajaro. Huapi inaraha Jesocristodsa itassaqquidsapi pina pohua assire ojarijarissa inajaro. Iapi ojari ojari inaridsaraha imecotedeni huapimapi ijariquijaro.

⁶ Diopa iadsa nahatohue onihi onihi nehe da inaridsajaro. Pohua jipa tahicca madija ohuahadsa, ohuahadsa da inaridsajaro. Dio-jine nema nadsapi Pohua Atti huati iquimanijine madijadsa nahatohue da inadsapi najaripa Pohua Atti huati iquimaridsana. Pohua bodidsa: –Pajissa Dio ohuadsa huati tajari –nadsapa *Dio Atti huati toquimade tojahijine bica tahi. ⁷ Diocca nahatohue onhipi madija bijideni acco icamabaquihijine. Najaro nahatohue iadsa inanadsapi acco icamabaquihissa tana. Madija mari icanabaquihijine Dio iadsa inanadsa naqui madija inahatta-baquihijine disseraquiri inana. ⁸ Ettidsa madija bodi inahatidse-hijine Dio iadsa inanadsa naqui disseraquiri inana. Madijadsa da inani-jine Dio iadsa inanadsa naqui accora inadsa da inana. Quequeri-quimana najari cacahuade Dio iadsa inanadsa naqui dissera-quiri inana. Tohuati nahanaquiri najarideni acco camade Dio iadsa inanadsa naqui etidsedsa acco icamabaquina.

**Jesocristocca madija
tiquejenaropi ajima tiquinaji**

⁹ Pajissara madija huapimadsa tetideni huanacquiri naji.

Tabaccorehedsapi jiperaququiri tiquinaji. Ima bicanitohuina disseraqquri tiquinaji. ¹⁰Jesocristodsa jehe tiquinajaropi pina tia timecote tedseje tetideni cahanerajaro-ssa tiquinaji. Timecotedeni bica tabicca cajimanapohuijine naco tetidsemanadsa: –Ohuapi dsotode –tiquinana. Timecote ima bicani inanadsa naqui pohuadsa: –Jehe, tijine bica tani –tiquinana. Nema ticanirere canadsapi bica tani.

¹¹Tidsepedeni ijimananijinepi iboququiri tiquinejeraji. Tibodideni huatidseri nadsa ia Medsedesda tidsepedeni ijimanana.

¹²Aji titedsejemadenicca ima bicanitohui timadimanadsapi huatidsehema timadimanaji. Ocasserani temanadsa naqui mohuaradsa tinahanamanaji. Diodsa huatide naqui tinebomana- jeraji.

¹³Jesocristodsa pajissa quina- jarideni cappiramanadsa naco tiadenina pohuadenidsa da tiquinana. Madija ticcadeni odsadsa bacco najonamanadsa naco pohua- denidsa bicaququiri tiquinaji. Pohua- denidsa: –Nija, jai tijedsimaji. Aja, tijipamanaji. Ajidsa ticahadijanijine bica tani –tiquinana.

¹⁴Madija tiadenidsa jara jara quinadsa naco tamassomana tejeraji. Ima bicani cajimanahijine Diodsara huati huati tiquinana.

¹⁵Titessedenidsa ima bicani tojadsapi pohuadeni tedseje tetidse- manaji. Titessedenidsa ima ocassera tanicca tojadsapi pohuadeni tedseje oji tiquinaji.

¹⁶Ticajonerara canadsa timadi- manaji. –Ohuana deni ojani –tiquinejeraji. Pina timecote

ajamani toquejenajaridenissa tiquinaji. –Ohuana denima nahato onajaro –tiquinejeraji.

¹⁷Madija tiadenidsa ima inana- manadsa naqui manaco pohuadeni- dsa ima tinanamana- jeraji. Ima bicani tinanamamanijinera dissera- qquri tiquinaji. Nadsapa madija huapima ticcadeni madie qqui toquinadsa: –Jehe, poccadeni ima bica tani –quinahijine. ¹⁸Madija huapima tedseje ticajonerara canehe timadimananijinine dissera- qquri tiquinaji. ¹⁹Ohuemecote- deni, tiadenidsa ohuati huana tani. Madijajine tiadenidsa ima ssonari- dsapi: –Manaco –tiquinejeraji. –Ohuacconepa Diona inajidso- baququhitohui –tiquinaji. Dio Atti dsodo nanipi ajima nani: –Pocca- deni najidsohue manaconipi Ohuana pohuadeni onajidsobaququhitohui –nahi nade ia Medsede. ²⁰Pohua Atti dsodo nani onihipi ajima nani: –Tiadsa huadi tajari pemidsa naco jipahijine da tinajo. Bacco dsaridsa naco dse nahijine passo da ticanaji. Nadsapa jabojobsa tocomehidsapa pano tomacchui nahitohui –nani nade Dio Atti dsodo nanidsa. ²¹Ima tabaccora tajaro tiadeni ajimani tonana- jeranijine disseraqquri tiquinaji. Ima bicani tinanamana- dsapi tabaccorehena ajimani toja- nijine.

**Ajijaro dsamacca
taminedeni attidenidsa
iboraququiri tiquinaji**

13 ¹Ajijaro dsamacca tamine- deni huapimapa Djojine dossehe cajimanajari. Dio tamine inana- jaradsapa tamine toja- jarahi. Najarojine madija huapimapa

taminedenidsa iboraquiri nahijine bica tani. ²Naraha madija taminedenicca cacahuehdsa huattajoqquri najaridenipa Diocca dossenijidsa naco huattajoqquri najari. Najarojine pohnadenidsa najidsohue sssonari najaro. ³Taminedenipa madija ima bicani tonanamanajardeni inajabojeri-baqquihijine jarahi. Madija ima tonanamanajaridenina inajabojeri-baqquihijine. Tamine noppinenedi ticappinamanajeranijinepi ima bicanira tinanamanaji. Nema tinanamanadsana ticcadeni taminepa tiadenidsa: –Ticcadeni ima bica tani –nahitohui. ⁴Ticcadeni taminepa Diojine dsepe ijijari tiadeni cacahuade. Naraha tabaccorehe tinanamanadsapi ticappinamanaji. Taminepa pohnama dosse dosse najarajari. Diocca dosseniji cajidsapa madija ima inanamanajaro manaconipi pohnadenidsa inassonari tani. ⁵Nema nadsapi taminedeni noppine ticappinamanadsa attidenidsa iboraquiri tiquinaji, nani tiadenidsa Diocca najidsohue ssonari-jeranijine, tibodideni bica tanijine. ⁶Nema nadsapi ticcadeni dsama ecahuanamanijine taminedeni ticcadeni dsiniro motatohui huati toquina dsapa pohnadenidsa da tiquinaji. (Najaro *dsiniro mota caria attidsapi: impuestos, quinajari.) Aji dsiniro inequeriquimanajaropi taminedenicca tarabadsa tojanijine. Dio jipa tadsa ticcadeni dsama cacahuade dsepedeni ihijimana najari.

⁷Madijadsa debe ticajimanadsapi pajiranissa tanicca da tiquinaji. Taminedsa dsiniro mota impuesto debe tiquinadsa naqui da tiquinaji.

Impuesto onihitohui huati toquina dsa naqui da taquimanaji. Tamine noppine ticappinamanadsa pohna atti naqui mohuaradsa timittamanaji. Pohnajine ima bica tadsa naqui pohnadsa: –Jehe, tijine bica tani –tiquinana.

Tohuati huanehe pajissacca

⁸Madijadsa debe tidsanapomana tejeraji. Naraha debe ojarie ticajimanadsanaponijinepi tohuati huanehe, aji tinoridenicca huapimadsa tetideni cahanerara canaridsanijine. Nema tinanamanadsapi Diocca dosseniji nemaneha tinapajiramananissa tajaro. ⁹*Diocca dosseniji Moisesidsa da inajaro motapi ajima najaro: –Madija ohuahacca amoneje tija tejeraji. Amoneje naqui maquideje amoneje cajijari tinaja tajarajo. Madija naco tinanadsoqqe tajarajo. Tiboti tejeraji. Madija cajijaricca tohuini tejeraji –najaro. Diocca dosseniji mota denima huapi taraha huapima tassaquidsa ojarie tojadsapi ajima najaro: –Tinoridenicadsa tetideni huanaquiri naji, pina tiadenidsa tetideni huanaquiri najarossa naji –nahi nade. ¹⁰Tinoridenicadsa tetideni huanaquiri nadsapi pohnadenidsa ima tinanamana-jeranitohui. Tetideni cahanerara caneha timadimandapsapi Diocca dosseniji nemaneha tinapajiramananissa tajaro.

¹¹Nema tiquinaji onajaropi icassiejeranijinecca huada huajirajonani. Tahide Jesocristodsapajissa inapodsapi: –Ia tohuaccamaccossani-baqquihijinecca huada huaji taccani –inaporaha jidapapi huajira tani. Tibodideni huatomanaji. Ticahadijajarossa

naporaha jidapapi nocco tique-jenaji. ¹²Dsidsini jicajonani. Ssiaja-jonani. Dsidsinicca imapi inebona. Pina eterobote ssiti coro inajarossa inana. Nadsapi ssiajanira edsana. Pina etero dsati edsajarossa inana. ¹³Jidapapi mohuaradsa imadina, pina madija ssiajanidsa madimanagerissa inana. Comani eridsa-jerana. Mohua mohua inaridsa-jerana. Huananehe inana-jerana. Imecca tohuini inajarods imadi-jerana. Huadiedsa naqui ahuaji atti ahuaji atti inejerana. Madija cajijari acconi naqui edijerana. ¹⁴Ajima tiquinanina bica tani: Ia Medsede Jesocristocca dacorehera tedsamanaji. Aji tibodidenidsa tohuini tiquinanicca tabaccorehe naqui tinanamana-jeraniijine ponide dacoco tijiraji.

Timecotecca imapi – Bica tejerani – taridsamana tejeraji

14 ¹Madija Jesocristodsaja jehe naraha pocca jeheniji japari tajaro tiadenidsa baccanadsapa: –Iadsa tiqquedsimani bica tani –tiquinaji. Naraha pohua tedseje ahuaji huati ahuaji huati tiquinejeraji. ²Aja imecotedeni motapa: –Bani huapima, dsamata huapima ijipani bica tani –quinaraha imecote ohuahadenicca jeheniji japari tadsapi: –Bani ijipani oppina tahi –quinajari. Nadsapa dsamatapara jipamanaanajari. ³Nadsama bani, dsamata huapima jipamanajaridenipa aja bani jipamana-jarajaridenidsa: –Ssamoqquiri tiquinani –quinajarana. Bani jipamana-jarajarideni naco pohuadeni imecotedenidsa: –Bani tijipamanadsapi ticcadeni

ima bica tejerani –quina-jarana. Tetideni ajimamana tejeraji: Diopatimecotedeni huapimadsa: –Occa madija –najari. ⁴Nadsama madija ohuahacca medsedsa: –Tijine bica tejerani –¿tiquinanijinequi? Najaropi ticcadeni ima jerani. Pohuajine ima bica tadsa, bica tejeradsa pohua medsedena pohuadsa huati tahijine. Najaro imassa najaro timecotedenicca ima nattome tiquinani bica tejerani. Ia Medsede pohuana madijacca ima inanabicanijine pajirahi.

⁵Madija mota naco: –Iapi ajijaro huadadsara Diodsa etidsenijine bica tani –quinaraha mota attidenipa: –Huada huapima najarossa caniquimerajaro. Huajijiradsa Diodsa ehetidse najaro –quinajari. Madija pohua pohua bodidsa ima bica tanicca icattejidsadsapi najarossa inanani bica tani. ⁶Imecotedeni motapa: –Ajijaro huadapi Diodsa etidsenijine icattejidsajaro –quinajari, Diodsa bica inanamananijine. Imecotedeni motapa bani, jijipa huapima jipamanajari. Diodsa bica inanamananijine nama quina dsapa Diodsa: –Ticca daniji bica tani –quiquinanajari. Imecotedeni motapa Diodsa bica inanamananijinepi dsamatapara jipamanadsa Diodsa: –Ticca daniji bica tani –quiquinanajari.

⁷Iapi ia tohuini inanicca tohuira imadi-jerani. Idsoqqenijine naqui ia tohuini inanicca jerani. ⁸Imadiccadsapi ia Medsede inahatidsehijine imadijaro. Idsoqquedsa naqui pohuadsa imadinijine. Nema najaroa aji imadidsa, idsoqquedsa ia Medsedecca iquejenaropaji. ⁹Najarotohui Cristopa dsoqqejari.

Nahatonidsapa madipomajari.
Pohuapa jicajarideni, camittaquiri
najarideni Medsededeni tojajari.

¹⁰ ¿Nejecotohui timecote-
dsa: –Ticca ima tabaccora tani
–tiquinajaro? ¿Nejecotohui pohua
ajamani tinanamanajari? Iapi
huapima Dio tedsejema idomo hua-
nitohui. Nanidsa icca ima huapima
Pohuana icattemanitohui. ¹¹Dio Atti
dsodo nanipi ajima najaro:

- Ohuapi pajissa omadini.
- Ohuatti naqui pajissa
- nahi nade ia Medse.
- Madija huapima otedsejema
pohuadeni pitodsa jassi
tahitohui.

Huapima attidenipa: “Tiana
deni tijani, bica tinani”
quinahitohui –nahi nade.

¹²Nidsa nanihuajipi ia huapima icca
madeicca ima ia mottacca Diodsa
ecomeranitohui.

Timecotecca ima tinassamomana tejerana

¹³Nadsapi timecotedeni
tedseje: –Ticca ima bica tejerani
–ticanirere cana-jezana. Ajima
tiquinanina bica tani: –Ohueme-
cote imasiridsa onehedima-
jarahijine ohua ohuacahuana
–tiquinaji. Timecotecca jeheniji
tinassamo-jezanijine tia tiara ticca
madie tecahuaji, onajaro. ¹⁴Ohuapi
ia Medseje Jesocristocca ojajarojine
obodidsa nahato onajaro: Dsama-
tapa, bani oppina tahicca nohue-
rahi. Naraha madija bodi: –Ajajari
bani ojipanipi Diodsa oppina tahi
–nadsa jipadsapa Diodsa bica
tejerani. Pohuadsa pina imasiri-
ssa najaro. ¹⁵Nadsapa timecotedsa
oppina tahicca pohua qqui tadsa

tijipadsapi jabojo tinanahitohui.
Pohuadsa oppina tahicca tijipa-
jaropi pohuadsa jipera tinajaro-
ssa najaro. Cristopa timecotetohui
naco dsoquejari. Paji tijipajarocca
imadsa pocca jeheniji tinassamo-
rana. ¹⁶Cristojine tiadsa oppinera
taraha madija ohuaha attidenipa:
–Tijine bica tejerani –quinarana.
Nama quina-jarahijine tia tecahuaji.
¹⁷Diocca cacahuehepi ijipanicca,
dse inanicca jerani. Pocca caca-
huehepi Pohua Corime ia acco
camadsa imasiri jirehe imadinissa
tajaro, joneheda imadijaro, etidseri
naridsajarona paji. ¹⁸Jesocristo-
cca medse iquejenadsapi najarossa
inanadsa imadinijine. Nadsana Dio
iadsa huatidsehitothui. Madija naco:
–Bicaquiri tiquinani –quina-
hitohui.

¹⁹Imecotedeni huapima
icajonerara cananijine, icca jehe-
niji denima todacorani nanijine
naqui disseraquiri inana. ²⁰Dio-
jine timecote madihissa tajaricca
ima tijipajarodsa tinassamo tejeraji.
Iadsa jijipa oppina tahicca nohue-
rahi. Huapima bica tahi. Naraha
ia ijipajarodsa imecotecca jeheniji
tossamojarona Diodsa bica tejerani.
²¹Icca ima bica tanijinepi imecote
inehedima-jaradsana bica tani.
Pohuadsa bani jipahijine oppina
tadsapa najari bani ijipa-jezana.
Dsedse inocco jano tanicca naqui
dse inejerana. Imecote inehedima-
hijinecca ima onih anidsa naqui
najaro inana-jezana. ²²Tibodidsa:
–Pajissa oppinera tahi –tadsapi
najaro tibodidsara nahato tinaji.
Diopa tibodi nahato tahi. Madija
pocca imajine pohua bodi ocassera
tajaradsapa huatidsehema madijari.

Pocca ima bica tani nahato tajari. ²³Naraha madijapa: –Ajajari ojipadsa ¿bica taqui? ¿Bica tejerahui? Ssamo onani –nadsa jipadsapa Diodsa bica tejerani. Pocca jeheniji pajiranissa tejeradsa Diojine oppinera tahi ssamo tajari. Ssamo taraha nama naha jipadsapa pocca ima bica tejerani. Madija pohua bodidsa: –Ajima onanadsapi Diodsa tabaccora tani –naraha nama naha najaro ima inanadsapi imasiri cajijari.

Tinoridenicca tinahatidsebaquimanahijine bica tani

15 ¹Imecotedeni motapa Dio jipa tahirica ssamoqquiri najarijine poccadeni jeheniji japari tajaro. Naraha ia icca jeheniji dadoradsa pina acco icambaquina. Poccadeni ssamohue mohuaradsa inahanana. Ia ia inahatidsenira ojari-gerana. ²Ia huapima inoridenicca inahatidsebaquihina bica tajaro. Poccadeni ima tobicanijine, poccadeni jeheniji naqui denima todacoranjine disseraquiri inana. ³Cristopa pohua pohua nahatidsehijine bodi huato-jarajari. Nama najaripa Dio Atti dsodo napojarocca pohuadsa tojajaro. Najaropi ajima najaro: –Abi, Tiadsa tatamasso quinajaridenicca tamassohue ohuadsa naqui ssonarini –najari. ⁴Maittaccadsama Dio Atti dsodo quinapojaropi icahatteranjine dsodo quinajaro. Najaro iadsa huarionajaro hua inadsapi ia acco camajaro, Diodsa disseraquiri inanijine. Imittadsa naqui etidsejaro. Nema nadsapi itedsejemacca ima bicani icajinitohui nahatoquiri injaro. ⁵Dio

Pohuadsa disseraquiri inanijine, etidsenijine Pohuana iadsa inanjaro. Pohuapa tiadeni acco tocambaquidsa timecotedeni tedseje ticajonerara canehe timadimananjine. Pina Jesocristocca madiessa tinanamananjine. ⁶Nema tiquinadsapi tiadeni huapima tijariqqimanadsa tettideni ojariquidsa ia Medsede Jesocristocca Abi Diodsa jiri jiri titiquina nana.

Ima bicanipi jodio quejena-jarajaridenidsa bacco taridsajaro

⁷Nadsama Jesocristodsa jehe quinajaridenidsa: –Itesse tiquejenani bica tani –ticanirere canaridsana, pina Cristo tiadenidsa: –Ohuadsa tiquejenaji –najarissa tinanamanaji. Nema tinanamanadsapi Diocca deni tojehe ahuate tinanamananitohui. ⁸Tiadenidsa huati onajaro. Cristo jodiodeni acco icambaquihijine ccajonajaripa Dio icca ididenidsa huati tapojaricca ima inapajiranissa tanijine ccajonajari. Pajissara huati huati najonajaria Cristojine ahuate tarajopaji. ⁹Cristopa jodio quejena-jarajaridenitohui naco ccajonajari, Diocca tohuati huanehe qqui toquinadsa Pohuadsa huatidsemanahijine. Najaro imapi Dio Atti dsodo napojarodsa ajima najaro:

–Jodio quejena-jarajarideni madimanahihuaji “Diopa bica tahi” onaridsanitohui.

Tia oni deni tojajaro mittamanahijine naqui jiri jiri onaridsanitohui –napohui nade.

¹⁰Dio Atti dsodo napojaro onihi naqui:

–Jodio tiquejena-jarajarodeni Diocca madija tedseje Diodsa

tetidseridsamanaji –napohui nade.

¹¹Dio Atti dsodo napojaro onihipi:
–Jodio tiquejena-jerajarodeni
ia Medsededsa tetidsemanadsa:
“Bica tinani, deni tijani”
titiquina nana.

Dsama huapimacca madijadeni
Pohuadsa huatidsemanadsa:
“Bica tinani, deni tijani”
quinana –napohui nade.

¹²Dio Atti onihi Isahiajine dsodo
najaro naqui:

–Nidsaranibote *Dsesse-
Isahi potemahi tamine deni
tojahicca tojahitohui.

Jodio quejena-jarajarideni
ecahuabaquihitohui.

“Pohuajine itedsejemacca ima
bicani tojanitohui” quina-
hijine –napohui nade Isahia.

¹³*Itedsejemacca ima bicani
jinede Diopa Pohuadsa pajissa
tiquinajarodenidsa pocca
huatidsehe, pocca jonehe inana-
ridsana. Titedsejemadenicca
ima bicanitohui Pohua Corime-
cca dacorehema timadimanana,
onajaro.

¹⁴Ohuemecotedeni, ticcadeni ima
nahato onajaropi madija huapima-
dsa bicaquiri tiquinani. Djotine
nahatoquiri tiquinajaro. Nema
nadsapi timecote bodideni acco
ticamabaquiqui-manahijine tipajira-
manani. ¹⁵Naraha ajijaro ima teppe-
dsa tibodideni acco ocamabaquiqui-
nijine ima onihi onihi dacoranicca
tiadenidsa dsodo onajaro. Nahatoto
tinaraha tetideni ajimamana-jera-
nijine. Nema onajaropi Dio ohuadsa
huati huana tadsa ohua cadossejari.

¹⁶Jodio quejena-jarajaridenidsa
ima bicani tojanijine Jesocristodsa

odsepe ijijaro. Pina poccadeni Dio-
dsa dada toquimadessa onadsa
Diocca ima bicani icassiejeranijine-
cca mari ocanabaquijari. Nema
onadsapi pohuadenipa pina occa
daniji Diodsa da onajarossa quina-
jari. Najaro danijipi Pohuadsa bica
tajaro. Pohua Corime pohuadeni
inahirebaquidsapa Pohuadsa
toquejenahissa tajari.

¹⁷Jesocristo ohua acco cama-
dsapa Dio ohua cadossejaridsa
odsepe ijinissa tajarojine ohuati-
dsejaro. ¹⁸Ohuatidsedsapi ajijaro
imara huati huati onaridsanitohui:
Cristo ohua tonadacoradsapa jodio
quejena-jarajarideni Diodsa ibora-
quiri onanabaquijari. Ohuatti
mittamanadsa, occa madie naqui
qqi toquinajarijine Jesocristodsa
pajissa quinajari. ¹⁹Dio Corimecca
dacorehejine ocanahatoriri canani
qqi toquinadsa naco pajissa quina-
jari. Nema onaridsadsapi Jeso-
cristo tahimari icassiejeranijinecca
odsa panani Jerosaredsama mari
mari onaridsajaroa dsama Iliria-
huaji bacco onahuajanijaropajide.

²⁰Ohuapi Jesocristo tahimari
icassiejeranijinecca mittamanapo-
jarajarideni mittamanahijine
tohuini onadsa pohuadeni maride
dissera onajarode. Nema onajaropi
madija ohuahajine odsa canapiri-
jarodsa odsepe ijinijine jerani.

²¹Ojinepi pina Isahiajine Dio Atti
dsodo napojarossa najaro:

–Pohua tahimari mittamanapo-
jarajaridenipa noccodeni
ssire-re nahitohui.

Pohua tahimari pohuadenidsa
bacco tapo-jeraraha mitta-
manahitohui –napohui nade
Dio Atti.

**Pabloa: –Romahuaji
occana –najari**

²²Madija Jesocristo tahimari mittamanapo-jarajaridenidsa odsepe ijijarohne tiadeni qquide occanijine tossamo-dsanapojarode. ²³Huajano huapi taha tiadeni qquide occana occana ohonanade. Naraha jidapapi ahuajicca dsama huapimadsa Jesocristo tahimari ohuacomera-ridsehe jicani. ²⁴Nadsapi dsama Españaahuaji occadsa tiadenidsa ohuibocossaccanijine opajiradsapi nema onanitohui. Nanihuaji tiadeni qqui onabaqquidsa ohuatidsedsapi Españaahuaji occanijine ohua acco ticamamanana, onajaro, occa benehi pajiranissa tanijine. ²⁵Naraha tahidepi odsa panani Jerosarehuaji occaccanijine. Nanihuaji imecotedenidsa acco camehe dsojo onanijine. ²⁶Aja dsama Masedoniahuajicca, Acaihuajicca imecotedenipa Jerosarecca imecotedeni cappiramanaha madimanajaridenidsa dsiniro dosse quinajaro. Pohuadenipa cappiramanajarideni acco camade jipaqquiri nadsa dsiniro da inaqqi-manajaro. ²⁷Pohuadeni tohuini quinadsapa huatidsemanadsa nama quinajari. Aja jodiodeni motajine jodio quejena-jarajarideni Jesocristo tahimaridsa toquejenajari. Najaro ima bicani pohuadenidsa tojajaro manaconipi pina jodiodenidsa debe cajimanajarissa quinajari. Najarohne jodio quejena-jarajarideni poccadeni dsiniro mota jodiodenidsa da quinajaro bica tani. ²⁸Najaro poccadeni da naqqinaja Jerosarehuaji dsojo onadsa bacco onadsapi nahicca Jesocristodsa toquejenajaridenidsa da onanissa tanijine. Nadsapi

Españaahuaji occanijine ojoppemanitohui. Nadsa occadsana tiadeni qqui onabaqqunitohui. ²⁹Nani ticcadeni odsa panani Romadsa bacco onadsapi Cristocca ima bicani ssema tiadenidsa bacco onanitohui.

³⁰Ohuemecotedeni, ia Medsede Jesocristo onima tiadenidsa huati onana. Dio Corimecca tohuati huanehe iadsa inanajarodsa ohua acco ticamamanaji. Otohui Diosda huati huati tiquinaji. Ticcadeni huatinaja occa huatinaja tadsajani pina ijariqquijarossa nadsa Diodsa huatide disseraqquri inana. ³¹Dsama arobeni Jodeacca jehe quinajararidenicca najidsohuedsa Dio ohua dsori tonanahijine Pohuadsa huati huati tiquinaji. Aja Masedonideni, Acaiadenicca acco camehe Jerosarecca imecotedenidsa da onadsapi huatidsemanadsa: –Jehe bica tani –quinahijine naqui huati huati tiquinaji. ³²Nema tiquinaji onajaropi Dio jipa tadsa occa ima toccanissa tanijine. Nadsapi ohuatidsedsa tiadenihuaji bacco onanijine. Tiadeni qqui onabaqquidsa obodi jassi nanijine naqui Diodsa huati huati tiquinaji. ³³Jonehe jinede Diopa tiadeni acco tocamabaqquina, onajaro. Pajissa nema nana.

**Pabloa pohua tesse Romahuaji
madimanajaridenidsa
nija najari**

16 ¹Imecote Pebe tiadenidsa bacco tanitohui. Ponipi Secreahuajicca Jesocristodsa quequeriqquimana najarideni cacahuade. ²Ia Medsede onima ponidsa nija taridsamanaji. Poni ticatidsemanaji, pina Jesocristodsa iquejenajaro icatidserara cacana

najarossa tiquinaji. Poni bijini acco ticamamanaji. Ponipi madija acco icamabaquihui huapi tahi. Ohua naqui ohua acco camade.

³Prisiradsa, ponicca maquui Aquiradsa naqui nija onajaro. Pohuadenipa ohua tedseje Jesocristo tahimari maride idsepe iijjarode. ⁴Ohuadsa ima oppina tehe ssonaribote naraha ohua dsori inanamananijine pohuadenina pohuadeni ccaccoramanadsa topamajonabote najaride. Nadsapi pohuadenidsa: –Epejeni, ohuadsa tijinedeni bica tani –onajaro. Aja jodio quejenajarajari Jesocristodsa quequeriquiridsamana najarideni huapima naco Prisiradsa, Aquiradsa huatidsemanadsa: –Tijinedeni ima bica tani –quinajari.

⁵Prisira, Aquiradenicca odsadsa quequeriquimana najaridenidsa naqui nija onajaro. Otesse bicabote Epenetodsa naqui nija onajaro. Puhuapa dsama Asiahuajicca madija Jesocristodsa toquejenadsapa pohuana pajissa napojari.

⁶Mariadsa naqui nija onajaro. Ponipi tiadeni accode dsapani ijinissa tajaro.

⁷Adonicodsa, Joniadsa naqui nija onajaro. Pohuadenipa occa madija jodiodeni. Ohuadsama toponi cocorodsa bedsajaride. Pohuadenipa Jesocristocca dodosse tabaqqi bicaca tajari. Jesocristodsa ojajera-cadsama pohuadenipa tahide Jesocristodsa toquejenapojaride.

⁸Otesse Apiriatodsa naqui nija onajaro. Ia Medsededsa iquejenadsapi pohuadsa ohuati huana tajaro.

⁹Urbanodsa naqui nija onajaro. Puhuapa itesse Jesocristo tahimari dsepe ijiridsajari. Estaquidsa naqui nija onajaro. Puhuadsa ohuati huana tajaro.

¹⁰Aperedsa naqui nija onajaro. Pohuadsapi ima ocassera taraha Jesocristodsa dissera tajaricca ima ahuato tajaro. Aristoborocca odsacca madijadsa naqui nija onajaro.

¹¹Occa madija Herodiodsa nija onajaro. Narosisocca madija Jesocristodsa pajissa quinajaridenidsa nija onajaro.

¹²Trifenadsa, Trifosadsa nija onajaro. Ponideni pamehepi ia Medsededsa dsapanideni ijimanagero. Persidadsa naqui nija onajaro. Ponidsa ohuati huana tani. Poni naqui ia Medsededsa dsapani iijjaro.

¹³Rofodsa naqui nija onajaro. Puhuapa Jesocristocca medse bica tajari. Pocca amidsa naqui nija onajaro. Ponipi pina occa amissa najaro.

¹⁴Asicrito, Frecote, Hermese, Patroba, Herma quinajaridenidsa nija onajaro. Imecotedeni pohuadenidsa quequeriquimana najaridenidsa naqui nija onajaro.

¹⁵Pirorocodsa, Joriadsa nija onajaro. Nereo, pohua caripene, Oripa quinajaridenidsa naqui nija onajaro. Imecotedeni pohuadenidsa quequeriquimana najari huapimadsa nija onajaro.

¹⁶Tiadeni naqui titesse jehe quinajarideni tedseje bacco ticaniredsapi nija tiquinadsa dama, ticahuajacossa titiquina naji, onajaro. Jesocristodsa toquejenajari quequeriquiridsamana najarideni huapima tiadenidsa nija quinahi.

Paji, marinaja onihitiadeni tonehedima-baqquirana

¹⁷Ohuemecotedeni, ticattomama canaji. Tiadenidsa huati onana: Timecotedeni motajine ticcadeni

queriquinajacca ima caroberidsa-rana. Poccadeni marinajapi pina ticahatterapojarocca marinajassa nejerani. Paji, poccadeni marinajadsa tiadeni tonehedimabaqqi-manarana. Nadsapi pahuadenidsa tiajimanani naji, onajaro. ¹⁸ Pahuadenipa ia Medsede Jesocristocca medse quejena-jarahi. Pahuadeni tohuini quinahiccadsara disseraqquri najari. Attideni naco bica tadsa huati huati quinaraha maidsamanajari. Nama quinadsapa madija ima nattomede ssamoqquri najarideni icamaidsabaqqimana tahi. ¹⁹ Naraha tiadenipi ia Medsededsa iboraqquri tiquinani titahimari-deni madija mittaridsamanajari. Najarojine ohuatidsejaro. Nadsapi ima bicani tonanade nahatoqquri tiquinani ahuato tinanamanaji. Naraha ima tabaccora tajaro tonanadepi ssamoqquri tiquinana, onajaro. ²⁰ Jonehe jinede Diopa pocca huadi Satana ajamani inana-hijinecca huada bacco tabote nani. Pahuajine pina temoridenidsa ttai tinanaqquimanajarissa nahitohui. Ia Medsede Jesocristopa tiadenidsa ima bicani inanana, onajaro.

Pablo pohua tessedeni naco romanodenidsa nija quinajari

²¹ Timoteo naco tiadenidsa nija nahi. Pohua tedsejepi Jesocristo tahimari idsepe ijijaro. Occa madija Roso, Jasona, Sosipateo pahuadeni naco tiadenidsa nija quinahi.

²² Ohuapi Tersio. Ohua naqui Jesocristocca madija tiadenidsa nija

onajaro. Ajijaro ima teppepi Pablo huati huati tadsa dsodo onajaro.

²³ Caio naco tiadenidsa nija najari. Pocca odsadsana omadijaro. Pocca odsa Jesocristocca madijadsa accora tajari. Erasto naco tiadenidsa nija najari. Pahuapa ajijaro odsa pananicca dsiniro cacahuade. Imecote Coarto naco tiadenidsa nija najari.

[²⁴ Ia Medsede Jesocristopa tiadeni huapimadsa ima bicani inanana, onajaro. Pajissa nema nana.]

–Diodsa etidsena –najari Pablo pocca ima jicanicca

²⁵ Diodsa etidsena. Pocca ima bicani icassiejeranijinecca mari mari ohonanajaropi tiadeni tonadacora-baqquijaro. Najaropi Jesocristo tahimari timittamanajaropaji. Maittaccadsama dsama nahatopo-jeraccadsama Djotine najoraporaha ahuatora tapojaro. ²⁶ Naraha jidapanana tohuatojaro. Pina Dio Atti cacomeraqquri najarideni dsodo quinapojarossa, pina Dio madidsanapojaricca dosse-nijissa najaro Jesocristo tahimari dsama huapimacca madijadsa tojaridsajaro. Najarodsapa jissapa quinadsapa pahuadsa iboraqquri nahijine.

²⁷ Diopa ojarijari. Pahuana nahato tajari. Pahuajine Jesocristo tahimari iadsa tojadsapi Dio Pahuadsa etidsedsa: –¡Bica tinani, deni tijani! –ihidsanapo nana. Pajissa nema nana. Epejeni.